

# 《攝大乘論》講表

○將述此義，大科分四：

壹、解釋論題

貳、修學綱要

參、隨文釋義

肆、結示勸修

今初。

無著菩薩 造


玄奘大師 譯

韓清淨 科


壹、解釋論題<sup>三</sup>

— 《攝大乘論》 —

甲一、釋「攝」




甲二、釋「大乘」



— 法藏大師 —

○「論」——問辯徵析，剖斷開示，令得決定。


甲三、釋「論」



——釋壹、「解釋論題」竟——

——滿益大師——

貳、修學綱要



參、隨文釋義<sup>三</sup>

○入文分三：甲一、總標綱要分。甲二、依標廣釋分。甲三、結指釋竟分。 今初

甲一、總標綱要分（分二：乙一、明造論意。乙二、明論所依）

乙一、明造論意

《阿毘達磨大乘經》中，薄伽梵前已能善入大乘菩薩，為顯大乘體大故說。

乙二、明論所依（分三：丙一、標顯。丙二、辨次第。丙三、顯能攝）

丙一、標顯（分二：丁一、長行。丁二、頌）

丁一、長行（分二：戊一、標。戊二、顯）

戊一、標（分三：己一、標十相數。己二、列十相名。己三、結顯佛語）

己一、標十相數

謂依大乘，諸佛世尊有十相殊勝殊勝語：

己二、列十相名

一者，所知依殊勝殊勝語；二者，所知相殊勝殊勝語；三者，入所知相殊勝殊勝語；四者，彼入因果殊勝殊勝語；五者，彼因果修差別殊勝殊勝語；六者，即於如是修差別中。增上

戒殊勝殊勝語；七者，即於此中，增上心殊勝殊勝語；八者，即於此中，增上慧殊勝殊勝語；九者，彼果斷殊勝殊勝語；十者，彼果智殊勝殊勝語。

己三、結顯佛語

由此所說，諸佛世尊契經諸句顯於大乘，真是佛語。

戊二、顯（分二：己一、顯是佛語。己二、顯是大乘性。）

己一、顯是佛語（分三：庚一、乘前起問。庚二、出體正答。庚三、結依大乘。）

庚一、乘前起問

復次，云何能顯？

庚二、出體正答（分三：辛一、標簡。辛二、釋體。辛三、顯勝。）

辛一、標簡

由此所說十處，於聲聞乘曾不見說，唯大乘中處處見說。

辛二、釋體

謂阿賴耶識，說名所知依體。三種自性：一、依他起自性，二、徧計所執自性，三、圓成實自性；說名所知相體。唯識性，說名入所知相體。六波羅蜜多，說名彼入因果體。菩薩

十地，說名彼因果修差別體。菩薩律儀，說名此中增上戒體。首楞、伽摩、虛空藏等諸三摩地，說名此中增上心體。無分別智，說名此中增上慧體。無住涅槃，說名彼果斷體。三種佛身：一、自性身，二、受用身，三、變化身；說名彼果智體。

辛三、顯勝（分二：壬一、顯異餘乘。壬二、顯自最勝。）

壬一、顯異餘乘

由此所說十處。顯於大乘異聲聞乘。

壬二、顯自最勝

又顯最勝，世尊但為菩薩宣說。

庚三、結依大乘

是故應知：但依大乘，諸佛世尊有十相殊勝殊勝語。

己二、顯是大乘性（分二：庚一、牒前更徵。庚二、顯義重答。）

庚一、牒前更徵

復次，云何由此十相殊勝殊勝如來語故，顯於大乘，真是佛語？遮聲聞乘，是大乘性？

庚二、顯義重答（分二：辛一、重舉標簡。辛二、顯成大性。）

辛一、重舉標簡

由此十處，於聲聞乘曾不見說，唯大乘中處處見說。

辛二、顯成大性

謂此十處，是最能引大菩提性，是善成立，隨順無違，為能證得一切智智。

丁二、頌（分二：戊一、標。戊二、顯。）

戊一、標

此中二頌：

所知依及所知相，彼入因果彼修異，

三學彼果斷及智，最上乘攝是殊勝。

戊二、顯

此說此餘見不見，由此最勝菩提因，

故許大乘真佛語，由說十處故殊勝。

丙二、辨次第（分三：丁一、問。丁二、答。丁三、結。）

丁一、問

復次，云何如是次第，說此十處？

丁二、答（分七：戊一、所知依。戊二、所知相。戊三、入所知相。戊四、彼入因果。戊五、  
彼因果修差別。戊六、三學。戊七、二果。）

戊一、所知依

謂諸菩薩，於諸法因要先善己，方於緣起應得善巧。

戊二、所知相

次後於緣所生諸法，應善其相，善能遠離增益、損減二邊過故。

戊三、入所知相

次後如是善修菩薩，應正通達善所取相，令從諸障必得解脫。

戊四、彼入因果

次後通達所知相已，先加行位六波羅蜜多，由證得故。應更成滿，增上意樂得清淨故。

戊五、彼因果修差別

次後清淨意樂所攝六波羅蜜多，於十地中分分差別，應勤修習，謂要經三無數大劫。

戊六、三學

次後於三菩薩所學，應令圓滿。

戊七、二果

既圓滿已，彼果涅槃及與無上正等菩提，應現等證。

丁三、結

故說十處如是次第。

丙三、顯能攝

又，此說中一切大乘皆得究竟。

甲二、依標廣釋分（分十：乙一、所知依分。乙二、所知相分。乙三、入所知相分。乙四、彼入因果分。乙五、彼因果修差別分。乙六、增上戒學。乙七、增上心學。乙八、增上慧學。乙九、彼果斷分。乙十、彼果智分。）

乙一、所知依分（分二：丙一、牒前出體。丙二、六門分別）

丙一、牒前出體

此中最初，且說所知依，即阿賴耶識。

丙二、六門分別（分六：丁一、阿賴耶識句義。丁二、阿賴耶識異門。丁三、阿賴耶識體相。丁四、阿賴耶識決擇。丁五、阿賴耶識差別。丁六、阿賴耶識性攝。）

丁一、阿賴耶識句義（分二：戊一、引教。戊二、釋名。）

戊一、引教（分二：己一、問。己二、答。）

己一、問

世尊何處說阿賴耶識，名阿賴耶識？

己二、答（分二：庚一、證為所知依體。庚二、證得阿賴耶名。）

庚一、證為所知依體

謂薄伽梵於《阿毘達磨大乘經》伽陀中說：

無始時來界，一切法等依，

由此有諸趣，及涅槃證得。

庚二、證得阿賴耶名

即於此中，復說頌曰：

由攝藏諸法，一切種子識，

故名阿賴耶，勝者我開示。

戊二、釋名（分二：己一、結前起問。己二、依義正答。）

己一、結前起問

如是且引阿笈摩證。復何緣故，此識說名阿賴耶識？

己二、依義正答（分二：庚一、約能所藏義釋。庚二、約執藏義釋。）

庚一、約能所藏義釋

一切有生雜染品法，於此攝藏為果性故；又即此識，於彼攝藏為因性故，是故說名阿賴耶識。

庚二、約執藏義釋

或諸有情，攝藏此識爲自我故，是故說名阿賴耶識。

丁二、阿賴耶識異門（分二：戊一、訓釋安立。戊二、敘破異執。）

戊一、訓釋安立（分三：己一、依大乘教。己二、依聲聞乘教。己三、總成）

己一、依大乘教（分二：庚一、釋異名。庚二、釋妨難）

庚一、釋異名（分二：辛一、釋阿陀那名。辛二、釋心）

辛一、釋阿陀那名（分二：壬一、引教。壬二、釋名）

壬一、引教

復次，此識亦名阿陀那識。此中阿笈摩者，如《解深密經》說：

阿陀那識甚深細，一切種子如瀑流，

我於凡愚不開演，恐彼分別執爲我。

壬二、釋名（分三：癸一、問。癸二、答。癸三、結）

癸一、問

何緣此識，亦復說名阿陀那識？

癸二、答（分三：子一、標。子二、徵。子三、釋）

子一、標

執受一切有色根故，一切自體取所依故。

子二、徵

所以者何？

子三、釋

有色諸根，由此執受，無有失壞，盡壽隨轉。又於相續正結生時，取彼生故，執受自體。

癸三、結

是故，此識亦復說名阿陀那識。

辛二、釋心（分二：壬一、引教。壬二、釋名。）

壬一、引教

此亦名心。如世尊說：「心、意、識三。」

壬二、釋名（分二：癸一、例釋意名。癸二、正釋心名。）

癸一、例釋意名（分三：子一、出體。子二、證成。子三、性攝。）

子一、出體（分三：丑一、出二體。丑二、顯識依。丑三、釋得名。）

丑一、出二體（分二：寅一、無間滅意。寅二、染污意）

寅一、無間滅意

此中意有二種：第一，與作等無間緣所依止性，無間滅識，能與意識作生依止；

寅二、染污意

第二，染污意，與四煩惱恒共相應：一者，薩迦耶見；二者，我慢；三者，我愛；四者，無明。

丑二、顯識依

此即是識雜染所依。識復由彼第一依生，第二雜染了別境義故。

丑三、釋得名

等無間義故，思量義故，意成二種。

子二、證成（分二：丑一、長行。丑二、頌。）

丑一、長行（分二：寅一、問。寅二、答。）

寅一、問

復次，云何得知有染污意？

寅二、答（分六：卯一、無不共無明過。卯二、無五同法過。卯三、無訓釋詞過。卯四、無二定別過。卯五、無想無染過。卯六、我執不恒行過）

卯一、無不共無明過

謂此若無，不共無明則不得有，成過失故。

卯二、無五同法過（分二：辰一、標過。辰二、釋理）

辰一、標過

又五同法亦不得有，成過失故。

辰二、釋理

所以者何？以五識身，必有眼等俱有依故。

卯三、無訓釋詞過

又訓釋詞亦不得有，成過失故。

卯四、無二定別過（分二：辰一、標過。辰二、釋理。）

辰一、標過

又無想定與滅盡定差別無有，成過失故。

辰二、釋理

謂無想定染意所顯，非滅盡定。若不爾者，此二種定應無差別。

卯五、無想無染過

又無想定，一期生中應無染污，成過失故。於中若無我執我慢。

卯六、我執不恒行過（分三：辰一、顯正。辰二、斥非。辰三、結立）

辰一、顯正

又一切時我執現行，現可得故，謂善、不善、無記心中。

辰二、斥非

若不爾者，唯不善必彼相應故，有我、我所，煩惱現行，非善、無記。

辰三、結立

是故，若立俱有現行，非相應現行，無此過失。

丑二、頌（分三：寅一、顯六種過失。寅二、顯過失種類。寅三、釋不共無明。）

寅一、顯六種過失

此中頌曰：

若不共無明，及與五同法，訓詞一定別，無皆成過失。

無想生應無，我執轉成過，我執恒隨逐，一切種無有。

寅二、顯過失種類

離染意無有，二三成相違，無此一切處，我執不應有。

寅三、釋不共無明

真義心當生，常能為障礙，俱行一切分，謂不共無明。

子三、性攝（分三：丑一、法。丑二、喻。丑三、合。）

丑一、法

此意染污故，有覆無記性，與四煩惱常共相應。

丑二、喻

如色、無色二纏煩惱，是其有覆無記性攝，色、無色纏為奢摩他所攝藏故。

丑三、合

此意一切時微細隨逐故。

癸二、正釋心名（分二：子一、出體。子二、釋名。）

子一、出體

心體第三，若離阿賴耶識無別可得。是故成就阿賴耶識，以為心體。由此為種子，意及識轉。

子二、釋名（分二：丑一、問。丑二、答。）

丑一、問

何因緣故，亦說名心？

丑二、答

由種種法熏習種子所積集故。

庚二、釋妨難（分二：辛一、難。辛二、釋。）

辛一、難

復次，何故聲聞乘中，不說此心名阿賴耶識、名阿陀那識？

辛二、釋（分二：壬一、略。壬二、廣。）

壬一、略

由此深細境所攝故。

壬二、廣（分二：癸一、徵。癸二、答）

癸一、徵

所以者何？

癸二、答（分二：子一、釋不為聲聞說。子二、釋為菩薩說）

子一、釋不為聲聞說

由諸聲聞，不於一切境智處轉。是故於彼，雖離此說，然智得成，解脫成就，故不為說。

子二、釋為菩薩說

若諸菩薩，定於一切境智處轉，是故為說。若離此智，不易證得一切智智。

己二、依聲聞乘教（分二：庚一、標密意。庚二、釋異名）

庚一、標密意

復次，聲聞乘中，亦以異門密意，已說阿賴耶識。

庚二、釋異名（分三：辛一、阿賴耶。辛二、根本識。辛三、窮生死蘊）

辛一、阿賴耶（分二：壬一、引教。壬二、結顯）

壬一、引教

如彼《增壹阿笈摩》說：世間眾生愛阿賴耶，樂阿賴耶，欣阿賴耶，喜阿賴耶。為斷如是阿賴耶故，說正法時，恭敬攝耳，住求解心，法隨法行。如來出世，如是甚奇希有正法，出現世間。

壬二、結顯

於聲聞乘《如來出現四德經》中，由此異門密意，已顯阿賴耶識。

辛二、根本識

於大眾部阿笈摩中，亦以異門密意，說此名根本識，如樹依根。

辛三、窮生死蘊（分二：壬一、標名。壬二、釋伏難）

壬一、標名

化地部中，亦以異門密意，說此名窮生死蘊。

壬二、釋伏難

有處有時見色心斷，非阿賴耶識中彼種有斷。

己三、總成

阿賴耶如是，所知依說阿賴耶識為性，阿陀那識為性，心為性，阿賴耶為性，根本識為性，窮生死蘊為性等。由此異門，阿賴耶識成大王路。

戊二、敘破異執（分二：己一、心。己二、阿賴耶）

己一、心（分二：庚一、敘計。庚二、破成）

庚一、敘計

復有一類，謂心、意、識義一文異。

庚二、破成（分二：辛一、破。辛二、成）

辛一、破

是義不成。

辛二、成

意、識兩義，差別可得。當知心義，亦應有異。

己二、阿賴耶（分二：庚一、敘計。庚二、破成）

庚一、敘計

復有一類，謂薄伽梵所說眾生愛阿賴耶，乃至廣說，此中五取蘊說名阿賴耶。有餘復謂貪俱樂受名阿賴耶，有餘復謂薩迦耶見名阿賴耶。

庚二、破成（分二：辛一、略。辛二、廣）

辛一、略（分二：壬一、破彼過失。壬二、成自最勝）

壬一、破彼過失

此等諸師由教及證，愚於藏識，故作此執，如是安立阿賴耶名。隨聲聞乘安立道理，亦不相應。

壬二、成自最勝

若不愚者，取此藏識，安立彼說阿賴耶名。如是安立，則為最勝。

辛二、廣（分三：壬一、徵。壬二、破彼過失。壬三、成自最勝）  
壬一、徵

云何最勝？

壬二、破彼過失（分三：癸一、破五取蘊。癸二、破貪俱樂部。癸三、破薩迦耶見）  
癸一、破五取蘊

若五取蘊名阿賴耶，生惡趣中一向苦處，最可厭逆，眾生一向不起愛樂。於中執藏，不應道理。以彼常求速捨離故。

癸二、破貪俱樂部

若貪俱樂部名阿賴耶，第四靜慮以上，無有具彼有情，常有厭逆。於中執藏，亦不應理。

癸三、破薩迦耶見

若薩迦耶見名阿賴耶，於此正法中信解無我者，恒有厭逆。於中執藏，亦不應理。

壬三、成自最勝（分三：癸一、明性攝。癸二、釋前非。癸三、結安立）

癸一、明性攝

阿賴耶識，內我性攝。

癸二、釋前非（分三：子一、釋惡趣愛。子二、釋寂靜愛。子三、釋無我愛）

子一、釋惡趣愛

雖生惡趣一向苦處，求離苦蘊，然於藏識我愛隨縛，未嘗求離。

子二、釋寂靜愛

雖生第四靜慮以上，於貪俱樂部恒有厭逆，然於藏識我愛隨縛。

子三、釋無我愛

雖於此正法信解無我者，厭逆我見，然於藏識我愛隨縛。

癸三、結安立

是故，安立阿賴耶識名阿賴耶，成就最勝。

丁三、阿賴耶識體相（分二：戊一、正辨安立。戊二、兼說餘緣）

戊一、正辨安立（分二：己一、長行。己二、頌）

己一、長行（分三：庚一、結前問後。庚二、標釋三相。庚三、重成三相）

庚一、結前問後

如是已說阿賴耶識安立異門。安立此相，云何可見？

庚二、標釋三相（分二：辛一、標。辛二、釋。）

辛一、標

安立此相，略有三種：一者，安立自相；二者，安立因相；三者，安立果相。

辛二、釋（分三：壬一、自相。壬二、自相。壬三、果相。）

壬一、自相

此中安立阿賴耶識自相者，謂依一切雜染品法所有熏習，為彼生因。由能攝持種子相應。

壬二、因相

此中安立阿賴耶識因相者，謂即如是一切種子阿賴耶識，於一切時，與彼雜染品類諸法現前為因。

壬三、果相

此中安立阿賴耶識果相者，謂即依彼雜染品法無始時來所有熏習，阿賴耶識相續而生。

庚三、重成三相（分三：辛一、自相。辛二、因相。辛三、果相）

辛一、自相（分二：壬一、喻熏習理。壬二、辨種一異）

壬一、喻熏習理（分四：癸一、徵。癸二、釋。癸三、喻。癸四、合）

癸一、徵

復次何等名為熏習？熏習能詮。何為所詮？

癸二、釋

謂依彼法俱生俱滅。此中有能生彼因性，是謂所詮。

癸三、喻（分二：子一、世間共成喻。子二、餘部共成喻）

子一、世間共成喻

如苴中有花熏習，苴華俱生俱滅。是諸苴，帶能生彼香因而生。

子二、餘部共成喻（分二：丑一、貪等熏習。丑二、多聞熏習）

丑一、貪等熏習

又如所立貪等行者，貪等熏習，依彼貪等俱生俱滅。此必帶彼生因而生。

丑二、多聞熏習

或多聞者，多聞熏習。依聞作意俱生俱滅。此心帶彼記因而生。由此熏習能攝持故，名持法者。

癸四、合

阿賴耶識熏習道理，當知亦爾。

壬三、辨種一異（分二：癸一、徵。癸二、釋）

癸一、徵

復次，阿賴耶識中諸雜染品法種子，為別異住？為無別異？

癸二、釋（分二：子一、釋雙非。子二、釋相應）

子一、釋雙非

非彼種子有別實物於此中住，亦非不異。

子二、釋相應

然阿賴耶識如是而生，有能生彼功能差別，名一切種子識。

辛二、因相（分三：壬一、喻與諸法更互為因。壬二、喻與異雜諸法為因。

壬三、顯生諸法有二緣起）

壬一、喻與諸法更互為因（分二：癸一、徵。癸二、釋）

癸一、徵

復次，阿賴耶識與彼雜染諸法，同時更互為因，云何可見？

癸二、釋（分二：子一、舉喻。子二、合法）

子一、舉喻（分二：丑一、三法喻。丑二、二法喻）

丑一、三法喻

譬如明燈、焰、炷生燒，同時更互。

丑二、二法喻

又如蘆束，互相依持，同時不倒。

子二、合法（分二：丑一、釋互為因。丑二、釋立因緣）

丑一、釋互為因

應觀此中更互為因，道理亦爾。如阿賴耶識為雜染諸法因，雜染諸法亦為阿賴耶識因。

丑二、釋立因緣

唯就如是安立因緣，所餘因緣不可得故。

壬三、喻與異雜諸法為因（分二：癸一、徵。癸二、釋）

癸一、徵

云何熏習無異無雜，而能與彼有異有雜諸法為因？

癸二、釋（分二：子一、舉喻。子二、合法）

子一、舉喻

如眾纈具纈所纈衣，當纈之時，雖復未有異雜非一品類可得，入染器後，爾時衣上便有異雜，非一品類。染色紋絡，文像顯現。

子二、合法

阿賴耶識亦復如是。異雜能熏之所熏習，於熏習時，雖復未有異雜可得，果生染器現前已後，便有異雜，無量品類諸法顯現。

壬三、顯生諸法有二緣起（分三：癸一、乘標緣起。癸二、說緣起別。癸三、喻愚緣起）

癸一、乘標緣起

如是緣起，於大乘中極細甚深。

癸二、說緣起別（分二：子一、標。子二、釋）

子一、標

又若略說有二緣起：一者，分別自性緣起；二者，分別愛非愛緣起。

子二、釋（分二：丑一、釋自性緣起。丑二、釋愛非愛緣起）

丑一、釋自性緣起

此中依止阿賴耶識，諸法生起，是名分別自性緣起。以能分別種種自性為緣性故。

丑二、釋愛非愛緣起

復有十二支緣起，是名分別愛非愛緣起。以於善趣惡趣，能分別愛、非愛種種自體為緣性故。

癸三、喻愚緣起（分三：子一、愚二種。子二、舉喻。子三、合法）

子一、愚二種（分二：丑一、愚第一緣起。丑二、愚第二緣起）

丑一、愚第一緣起

於阿賴耶識中，若愚第一緣起，或有分別自性爲因，或有分別宿作爲因，或有分別自在變化爲因，或有分別實我爲因，或有分別無因無緣。

### 丑二、愚第二緣起

若愚第二緣起，復有分別我爲作者，我爲受者。

### 子二、舉喻

譬如眾多生盲士夫未曾見象，復有以象說而示之。彼諸生盲，有觸象鼻，有觸其牙，有觸其耳，有觸其足，有觸其尾，有觸脊梁。諸有問言：象爲何相？或有說言象如犁柄，或說如杵，或說如箕，或說如臼，或說如帚，或有說言象如石山。

### 子三、合法

若不解了此二緣起，無明生盲，亦復如是。或有計執自性爲因，或有計執宿作爲因，或有計執自在爲因，或有計執實我爲因，或有計執無因無緣，或有計執我爲作者，我爲受者。阿賴耶識自性、因性及果性等，如所不了象之自性。

辛三、果相

又若略說阿賴耶識，用異熟識，一切種子爲其自性，能攝三界一切自體、一切趣等。

己二、頌（分二：庚一、通內外種辨。庚二、辨內種異於外種）

庚一、通內外種辨（分五：辛一、舉六種種子。辛二、釋種子六義。辛三、釋所熏四義。

辛四、破餘異執。辛五、顯為二因）

辛一、舉六種種子

此中五頌：

外內不明了，於二唯世俗，

勝義諸種子，當知有六種。

辛二、釋種子六義

剎那滅俱有，恒隨轉應知，

決定待眾緣，唯能引自果。

辛三、釋所熏四義

豎無記可熏，與能熏相應，

所熏非異此，是為熏習相。

辛四、破餘異執

六識無相應，三差別相違，

一念不俱有，類例餘成失。

辛五、顯為二因

此外內種子，能生引應知，

枯喪由能引，任運後滅故。

庚二、辨內種異於外種（分三：辛一、定不定熏別。辛二、失得過違別。辛三、非真依真別）

辛一、定不定熏別

為顯內種非如外種，復說二頌：

外或無熏習，非內種應知，

聞等熏習無，果生非道理。

辛二、失得過違別

作不作失得，過故成相違。

辛三、非真依真別

外種內為緣，由依彼熏習。

戊二、兼說餘緣（分三：己一、先舉轉識名能受者。己二、正說二識更互為緣。

己三、總以四緣料簡緣起）

己一、先舉轉識名能受者（分二：庚一、標義。庚二、引證）

庚一、標義

復次，其餘轉識，普於一切自體、諸趣，應知說名能受用者。

庚二、引證

如《中邊分別論》中說伽陀曰：

一則名緣識，第二名受者。

此中能受用，分別推心法。

己二、正說二識更互為緣（分二：庚一、標義。庚二、引證）

庚一、標義

如是二識，更互為緣。

庚二、引證

如《阿毘達磨大乘經》中說伽陀曰：

諸法於識藏，識於法亦爾，

更互為果性，亦常為因性。

己三、總以四緣料簡緣起（分二：庚一、別配。庚二、總顯）

庚一、別配（分三：辛一、第一緣起。辛二、第二緣起。辛三、第三緣起）

辛一、第一緣起

若於第一緣起中，如是二識，互為因緣。

辛二、第二緣起

於第二緣起中，復是何緣？是增上緣。

辛三、第三緣起

如是六識，幾緣所生？增上、所緣、等無間緣。

庚二、總顯

如是三種緣起，謂窮生死，愛非愛趣，及能受用。具有四緣。

丁四、阿賴耶識決擇（分三：戊一、結前問後。戊二、略標離阿賴耶識染淨不成。

戊三、廣顯染淨不成）

戊一、結前問後

如是已安立阿賴耶識異門及相。復云何知如是異門及如是相，決定唯在阿賴耶識，非於轉識？

戊二、略標離阿賴耶識染淨不成

由若遠離如是安立阿賴耶識，雜染、清淨皆不得成。謂煩惱雜染，若業雜染，若生雜染，皆不成故。世間清淨，出世清淨，亦不成故。

戊三、廣顯染淨不成道理（分二：己一、長行。己二、頌（釋淨轉依））

己一、長行（分三：庚一、別釋染淨種現不成。庚二、總破色心為染淨種不成。

庚三、結成許阿賴耶識）

庚一、別釋染淨種現不成（分二：辛一、辨三雜染。辛二、辨二清淨）

辛一、辨三雜染（分三：壬一、煩惱雜染。壬二、業雜染。壬三、生雜染）

壬一、煩惱雜染（分三：癸一、問。癸二、答）

癸一、問

云何煩惱雜染不成？

癸二、答（分三：子一、難六轉識為染種體不成。子二、難染污識初生無種不成。

子三、難對治識持煩惱種不成）

子一、難六轉識為染種體不成（分二：丑一、標義。丑二、徵破）

丑一、標義

以諸煩惱及隨煩惱，熏習所作。彼種子體，於六識身不應理故。

丑二、徵破（分二：寅一、徵。寅二、破）  
寅一、徵

所以者何？

寅二、破（分二：卯一、破眼識。卯二、例破餘）  
卯一、破眼識（分二：辰一、難持種不成。辰二、難受熏不成）  
辰一、難持種不成（分三：巳一、設義。巳二、隨難。巳三、喻結）  
巳一、設義

若立眼識，貪等煩惱及隨煩惱俱生俱滅。此由彼熏成種，非餘。

巳二、隨難（分二：午一、出過。午二、理破）  
午一、出過

即此眼識，若已謝滅，餘識所問，如是熏習、熏習所依，皆不可得。

午二、理破

從此先滅，餘識所問，現無有體。眼識與彼貪等俱生，不應道理。以彼過去現無體故。

巳三、喻結

如從過去現無體業，異熟果生，不應道理。

辰二、難受熏不成（分三：巳一、乘前更破。巳二、設難住處。  
巳三、結非所熏）

巳一、乘前更破

又此眼識貪等俱生，所有熏習，亦不成就。

巳二、設難住處（分三：午一、住貪中。午二、住餘識。午三、住自體）  
午一、住貪中

然此熏習，不住貪中。由彼貪欲是能依故，不堅住故。

午二、住餘識

亦不得住所餘識中。以彼諸識所依別故，又無決定俱生滅故。

午三、住自體

亦復不得住自體中。由彼自體，決定無有俱生滅故。

巳三、結非所熏

是故眼識，貪等煩惱及隨煩惱之所熏習，不應道理。又復此識，非識所熏。

卯二、例破餘

如說眼識，所餘轉識亦復如是，如應當知。

子二、難染污識初生無種不成

復次，從無想等上諸地沒，來生此間。爾時煩惱及隨煩惱所染初識，此識生時，應無種子。

由所依止及彼熏習，並已過去，現無體故。

子三、難對治識持煩惱種不成（分二：丑一、無識持種難。丑二、無種識生難）

丑一、無識持種難

復次，對治煩惱識若已生，一切世間餘識已滅。爾時若離阿賴耶識，所餘煩惱及隨煩惱種

子在此對治識中，不應道理。此對治識自性解脫故，與餘煩惱及隨煩惱不俱生滅故。

丑二、無種識生難

復於後時世間識生，爾時若離阿賴耶識，彼諸熏習及所依止，久已過去，現無體故，應無種子而更得生。

癸三、結

是故，若離阿賴耶識，煩惱雜染皆不得成。

壬三、業雜染（分二：癸一、問。癸二、答）

癸一、問

云何為業雜染不成？

癸二、答（分二：子一、難能引。子二、難能生）

子一、難能引

行為緣識，不相應故。

子二、難能生

此若無者，取為緣有，亦不相應。

壬三、生雜染（分三：癸一、問。癸二、答。癸三、結）

癸一、問

云何爲生雜染不成？

癸二、答（分二：子一、約生位辨。子二、約死位辨）

子一、約生位辨（分二：丑一、總難。丑二、別釋）

丑一、總難

結相續時，不相應故。

丑二、別釋（分二：寅一、非等引地。寅二、等引地）

寅一、非等引地（分二：卯一、初生位。卯二、生已位）

卯一、初生位（分四：辰一、出和合識。辰二、難非意識。辰三、設破徵責）

辰一、出和合識

若有於此非等引地沒已生時，依中有位意，起染污意識，結生相續。此染污意識，於中有中滅，於母胎中，識、羯羅藍，更相和合。

辰二、難非意識（分三：巳一、設義。巳二、隨難。巳三、理非）

巳一、設義

若即意識與彼和合，既和合已，依止此識，於母胎中有意識轉。

巳二、隨難

若爾，即應有二意識，於母胎中，同時而轉。

巳三、理非

又即與彼和合之識，是意識性。不應道理。依染污故，時無斷故，意識所緣不可得故。

辰三、設破徵責（分二：巳一、徵。巳二、責）

巳一、徵

設和合識即是意識，爲此和合意識，即是一切種子識？爲依止此識所生餘意識，是一切種子識？

巳二、責（分二：午一、立正。午二、破邪）

午一、立正

若此和合識是一切種子識，即是阿賴耶識，汝以異名立爲意識。

午二、破邪

若能依止識是一切種子識，是則所依因識，非一切種子識。能依果識是一切種子識，不應道理。

辰四、結成異熟識

是故成就此和合識非是意識。但是異熟識，是一切種子識。

卯二、生已位（分三：辰一、色根執受不成難。辰二、名色互依不成難。  
辰三、識食不成難）

辰一、色根執受不成難

復次，結生相續已，若離異熟識，執受色根亦不可得。其餘諸識各別依故，不堅住故。是諸色根，不應離識。

辰二、名色互依不成難

若離異熟識，識與名色更互相依，譬如蘆束，相依而轉，此亦不成。

辰三、識食不成難

若離異熟識，已生有情，識食不成。何以故？以六識中，隨取一識，於三界中已生有情能作食事，不可得故。

寅二、等引地（分二：卯一、總辨色無色界初生位。卯二、別顯無色界生已位）  
卯一、總辨色無色界初生位（分三：辰一、辨由染生。辰二、辨染所攝。  
辰三、結種子體）

辰一、辨由染生

若從此沒，於等引地正受生時，由非等引染污意識，結生相續。

辰二、辨染所攝

此非等引染污之心，彼地所攝。

辰三、結種子體

離異熟識，餘種子體，定不可得。

卯二、別顯無色界生已位（分二：辰一、約染善心難。辰二、約出世心難）  
辰一、約染善心難

復次，生無色界，若離一切種子異熟識，染污善心應無種子，染污善心應無依持。

辰二、約出世心難（分二：巳一、依前三無色辨。巳二、依非想非非想處辨）

巳一、依前三無色辨

又即於彼，若出世心正現在前，餘世間心皆滅盡故，爾時便應滅離彼趣。

巳二、依非想非非想處辨（分二：午一、難二趣滅離。午二、難非所依趣）

午一、難二趣滅離

若生非想非非想處、無所有處，出世間心現在前時，即應二趣，悉皆滅離。

午二、難非所依趣

此出世識，不以非想非非想處為所依趣，亦不應以無所有處為所依趣，亦非涅槃為所依趣。

子二、約死位辨

又將沒時，造善造惡，或下或上，所依漸冷。若不信有阿賴耶識，皆不得成。

癸三、結

是故，若離一切種子異熟識者，此生雜染，亦不得成。

辛二、辨二清淨（分二：壬一、世間清淨。壬二、出世清淨）

壬一、世間清淨（分三：癸一、問。癸二、答。癸三、結）

癸一、問

云何世間清淨不成？

癸二、答（分三：子一、舉事。子二、申難。子三、釋例）

子一、舉事

謂未離欲纏貪、未得色纏心者，即以欲纏善心，為離欲纏貪故，勤修加行。

子二、申難（分二：丑一、約界地難。丑二、約過現難）

丑一、約界地難

此欲纏加行心，與色纏心，不俱生滅故，非彼所熏。為彼種子，不應道理。

丑二、約過現難

又色纏心，過去多生餘心間隔，不應為今定心種子。唯無有故。

子三、釋例（分二：丑一、釋。丑二、例）

丑一、釋

是故，成就色纏定心，一切種子異熟果識，展轉傳來，爲今因緣；加行善心，爲增上緣。

丑二、例

如是一切離欲地中，如應當知。

癸三、結

如是世間清淨，若離一切種子異熟識，理不得成。

壬二、出世清淨（分二：癸一、問。癸二、答）

癸一、問

云何出世清淨不成？

癸二、答（分二：子一、出世心。子二、滅定識）

子一、出世心（分二：丑一、引教正難。丑二、廣釋聞熏習）

丑一、引教正難（分三：寅一、引教。寅二、正難。寅三、結過）

寅一、引教

謂世尊說：依他言音，及內各別如理作意，由此爲因，正見得生。

寅二、正難（分二：卯一、依如理作意相應心難。卯二、依出世心難）

卯一、依如理作意相應心難（分三：辰一、設徵。辰二、出過。辰三、申難）

辰一、設徵

此他言音、如理作意，為熏耳識？為熏意識？為兩俱熏？

辰二、出過

若於彼法如理思惟，爾時耳識且不得起，意識亦為種種散動餘識所間。

辰三、申難

若與如理作意相應生時，此聞所熏意識，與彼熏習，久滅過去，定無有體。云何復為種子，

能生後時如理作意相應之心？

卯二、依出世心難（分二：辰一、出過。辰二、申難）

辰一、出過

又此如理作意相應，是世間心；彼正見相應，是出世心，曾未有時俱生俱滅。

辰二、申難

是故此心，非彼所熏。既不被熏，為彼種子，不應道理。

寅三、結過

是故出世清淨，若離一切種子異熟果識，亦不得成。此中聞熏習，攝受彼種子，不相應故。

丑二、廣釋聞熏習（分四：寅一、釋妨難。寅二、辨品類。寅三、明所攝。

寅四、顯次第增）

寅一、釋妨難（分二：卯一、釋淨心種。卯二、釋種所依）

卯一、釋淨心種（分二：辰一、別問。辰二、總答）

辰一、別問（分二：巳一、染為淨種難。巳二、未習無種難）

巳一、染為淨種難

復次，云何一切種子異熟果識為雜染因，復為出世能對治彼淨心種子？

巳二、未習無種難

又出世心，昔未曾習，故彼熏習決定應無。既無熏習，從何種生？

辰二、總答

是故應答：從最清淨法界等流，正聞熏習種子所生。

卯二、釋種所依（分二：辰一、雙關徵難。辰二、答喻俱轉）

辰一、雙關徵難

此聞熏習，為是阿賴耶識自性？為非阿賴耶識自性？若是阿賴耶識自性，云何是彼對治種子？若非阿賴耶識自性，此聞熏習種子所依，云何可見？

辰二、答喻俱轉（分二：巳一、寄識中。巳二、非識性）

巳一、寄識中

乃至證得諸佛菩提，此聞熏習隨在一種所依轉處，寄在異熟識中，與彼和合俱轉。猶如水乳。

巳二、非識性

然非阿賴耶識，是彼對治種子性故。

寅二、辨品類

此中依下品熏習，成中品熏習；依中品熏習，成上品熏習。依聞、思、修多分修作得相應故。

寅三、明所攝（分二：卯一、明非阿賴耶識所攝。卯二、明是法身解脫身攝）

卯一、明非阿賴耶識所攝

又此正聞熏習種子下、中、上品，應知亦是法身種子。與阿賴耶識相違，非阿賴耶識所攝。是出世間最淨法界等流性故，雖是世間，而是出世心種子性。

卯二、明是法身解脫身攝（分二：辰一、先明世間勝利。辰二、正辨三乘身攝）

辰一、先明世間勝利

又出世心雖未生時，已能對治諸煩惱纏，已能對治諸嶮惡趣，已作一切所有惡業朽壞對治，又能隨順逢事一切諸佛菩薩。

辰二、正辨三乘身攝

雖是世間，應知初修業菩薩所得，亦法身攝。聲聞、獨覺所得，唯解脫身攝。

寅四、顯次第增（分二：卯一、顯轉依。卯二、引喻成）

卯一、顯轉依（分二：辰一、因相。辰二、果相）

辰一、因相

又此熏習，非阿賴耶識，是法身解脫身攝。如如熏習下、中、上品，次第漸增，如是如是，異熟果識，次第漸減，即轉所依。

辰二、果相

既一切種所依轉已，即異熟果識及一切種子，無種子而轉。一切種永斷。

卯二、引喻成（分二：辰一、乘徵。辰二、喻答）

辰一、乘徵

復次，云何猶如水乳非阿賴耶識，與阿賴耶識同處俱轉，而阿賴耶識一切種盡，非阿賴耶識一切種增？

辰二、喻答（分二：巳一、乳盡水在喻。巳二、離欲轉依喻）

巳一、乳盡水在喻

譬如於水，鵝所飲乳。

巳二、離欲轉依喻

又如世間得離欲時，非等引地熏習漸減，其等引地熏習漸增，而得轉依。

子二、滅定識（分三：丑一、引教。丑二、成自義。丑三、破他）

丑一、引教

又入滅定，識不離身。聖所說故。

丑二、成自義

此中異熟識，應成不離身，非爲治此滅定生故。

丑三、破他宗（分二：寅一、破有部。寅二、破經部）

寅一、破有部

又非出定，此識復生。由異熟識既間斷已，離結相續，無重生故。

寅二、破經部（分二：卯一、廣破彼執。卯二、略破性攝）

卯一、廣破彼執（分三：辰一、敘執。辰二、總破。辰三、廣難）

辰一、敘執

又若有執，以意識故，滅定有心。

辰二、總破

此心不成，定不應成故；

辰三、廣難（分三：巳一、難意識。巳二、難有心所。巳三、難無心所）  
巳一、難意識

所緣、行相不可得故；

巳二、難有心所

應有善根相應過故；不善、無記不應理故；應有想、受現行過故；觸可得故；於三摩地有功能故；應有唯滅想過失故；應有其思、信等善根現行過故；

巳三、難無心所

按彼能依，令離所依，不應理故；有譬喻故；如非徧行，此不有故。

卯二、略破性攝

又此定中，由意識故，執有心者，此心是善、不善、無記皆不得成。故不應理。

庚二、總破色心為染淨種不成（分二：辛一、敘執。辛二、難破）  
辛一、敘執

若復有執色心無間生，是諸法種子，

辛二、難破（分三：壬一、破前念為後念種。壬二、破色心無間生。壬三、成心無間滅）

壬一、破前念為後念種

此不得成。如前已說。

壬二、破色心無間生（分二：癸一、色心難。癸二、唯心難）

癸一、色心難

又從無色無想天沒，滅定等出，不應道理。

癸二、唯心難

又阿羅漢，後心不成。

壬三、成心無間滅

唯可容有等無間緣。

庚三、結成許有阿賴耶識

如是，若離一切種子異熟果識，雜染、清淨皆不得成。是故成就如前所說相，阿賴耶識決定是有。

己二、頌（釋淨轉依）（分三：庚一、淨心無餘難。庚二、對治非斷難。庚三、種體二無難）  
庚一、淨心無餘難

此中三頌：

菩薩於淨心，遠離於五識，無餘心轉依，云何汝當作？

庚二、對治非斷難

若對治轉依，非斷故不成，果因無差別，於永斷成過。

庚三、種體二無難

無種或無體，若許為轉依，無彼二無故，轉依不應理。

丁五、阿賴耶識差別（分二：戊一、問。戊二、答）  
戊一、問

復次，此阿賴耶識差別云何？

戊二、答（分二：己一、略標種別。己二、廣釋四種）  
己一、略標種別（分二：庚一、熏習。庚二、品類）  
庚一、熏習

略說應知或三種，或四種。此中三種者，謂三種熏習差別故。一、名言熏習差別；二、我見熏習差別；三、有支熏習差別。

庚二、品類

四種者，一、引發差別；二、異熟差別；三、緣相差別；四、相貌差別。

己二、廣釋四種（分四：庚一、引發差別。庚二、異熟差別。庚三、緣相差別。  
庚四、相貌差別）

庚一、引發差別（分二：辛一、正釋。辛二、反成）

辛一、正釋

此中引發差別者，謂新起熏習。

辛二、反成

此若無者，行爲緣識，取爲緣有，應不得成。

庚二、異熟差別（分二：辛一、正釋。辛二、反成）

辛一、正釋

此中異熟差別者，謂行有爲緣，於諸趣中異熟差別。

辛二、反成

此若無者，則無種子。後有諸法生應不成。

庚三、緣相差別（分二：辛一、正釋。辛二、反成）

辛一、正釋

此中緣相差別者，謂即意中我執緣相。

辛二、反成

此若無者，染污意中我執所緣應不得成。

庚四、相貌差別（分二：辛一、標。辛二、釋）

辛一、標

此中相貌差別者，謂即此識，有共相，有不共相，無受生種子相，有受生種子相等。

辛二、釋（分五：壬一、共不共等相。壬二、麤重輕安相。壬三、有無受盡相。

壬四、譬喻相。壬五、具足不具足相）

壬一、共不共等相（分二：癸一、正釋。癸二、反成）

癸一、正釋（分二：子一、別釋四種。子二、總顯對治）

子一、別釋四種

共相者，謂器世間種子。不共相者，謂各別內處種子。共相，即是無受生種子。不共相，即是有受生種子。

子二、總顯對治（分二：丑一、長行。丑二、頌）

丑一、長行（分二：寅一、顯差別。寅二、喻清淨）

寅一、顯差別

對治生時，唯不共相所對治滅。共相爲他分別所持，但見清淨。

寅二、喻清淨

如瑜伽師，於一物中，種種勝解，種種所見，皆得成立。

丑二、頌（分二：寅一、頌前共相。寅二、頌前譬喻）

寅一、頌前共相

此中二頌：

難斷難徧知，應知名共結，瑜伽者心異，由外相大故。

淨者雖不滅，而於中見淨，又清淨佛土，由佛見清淨。

寅二、頌前譬喻

復有別頌，對前所引種種勝解，種種所見，皆得成立。

諸瑜伽師於一物，種種勝解各不同，

種種所見皆得成，故知所取唯有識。

癸二、反成

此若無者，諸器世間、有情世間生起差別，應不得成。

壬三、麤重輕安相（分三：癸一、標名。癸二、正釋。癸三、反成）

癸一、標名

復有麤重相，及輕安相。

癸二、正釋

麤重相者，謂煩惱、隨煩惱種子。輕安相者，謂有漏善法種子。

癸三、反成

此若無者。所感異熟無所堪能、有所堪能所依差別，應不得成。

壬三、有無受盡相（分三：癸一、標名。癸二、正釋。癸三、反成）

癸一、標名

復有有受盡相、無受盡相。

癸二、正釋

有受盡相者，謂已成熟異熟果善、不善種子。無受盡相者，謂名言熏習種子。無始時來，種種戲論流轉種子故。

癸三、反成（分二：子一、成有受盡相。子二、成無受盡相）

子一、成有受盡相

此若無者，已作已作善、惡二業，與果受盡，應不得成。

子二、成無受盡相

又新名言熏習生起，應不得成。

壬四、譬喻相（分三：癸一、標名。癸二、正釋。癸三、反成）

癸一、標名

復有譬喻相。

癸二、正釋

謂此阿賴耶識，幻炎夢翳為譬喻故。

癸三、反成

此若無者，由不實徧計種子故，顛倒緣相，應不得成。

壬五、具足不具足相（分三：癸一、標名。癸二、正釋。癸三、反成）

癸一、標名

復有具足相、不具足相。

癸二、正釋（分二：子一、具足相。子二、不具足相）

子一、具足相

謂諸具縛者，名具足相；

子二、不具足相（分三：丑一、損減相。丑二、一分永拔相。丑三、全永拔相）

丑一、損減相

世間離欲者，名損減相。

丑二、一分永拔相

有學聲聞及諸菩薩，名一分永拔相。

丑三、全永拔相

阿羅漢、獨覺及諸如來，名煩惱障全永拔相，及煩惱所知障全永拔相。如其所應。

癸三、反成

此若無者。如是次第，雜染、還滅，應不得成。

丁六、阿賴耶識性攝（分二：戊一、問。戊二、答）

戊一、問

何因緣故，善不善法能感異熟，其異熟果無覆無記？

戊二、答（分三：己一、正釋。己二、反證。己三、結成）

己一、正釋

由異熟果無覆無記，與善、不善互不相違，善與不善互相違故。

己二、反證

若異熟果善不善性，雜染、還滅，應不得成。

己三、結成

是故，異熟識唯無覆無記。

乙二、所知相分（分二：丙一、結前問後。丙二、標釋正答）

丙一、結前問後

已說所知依，所知相復云何應見？

丙二、標釋正答（分二：丁一、牒前總標。丁二、依標別釋）

丁一、牒前總標

此略有三種：一、依他起相；二、徧計所執相；三圓成實相。

丁二、依標別釋（分六：戊一、出體。戊二、釋名。戊三、釋一異。

戊四、辨品類。戊五、釋妨難。戊六、釋契經)

戊一、出體(分三：己一、略釋三相。己二、廣釋二相)

己一、略釋三相(分三：庚一、依他起。庚二、徧計所執。庚三、圓成實相)

庚一、依他起(分三：辛一、問。辛二、答。辛三、結)

辛一、問

此中何者依他起相？

辛二、答(分三：壬一、標。壬二、徵。壬三、釋)

壬一、標

謂阿賴耶識為種子，虛妄分別所攝諸識。

壬二、徵

此復云何？

壬三、釋(分三：癸一、釋諸識。癸二、釋阿賴耶識為種子。癸三、釋虛妄分別所攝)

癸一、釋諸識

謂身身者受者識、彼所受識、彼能受識、世識、數識、處識、言說識、自他差別識、善趣  
惡趣死生識。

癸二、釋阿賴耶識為種子（分三：子一、由名言種。子二、由我見種。  
子三、由有支種）

子一、由名言種

此中若身身者受者識、彼所受識、彼能受識、世識、數識、處識、言說識，此由名言熏習  
種子。

子二、由我見種

若自他差別識，此由我見熏習種子。

子三、由有支種

若善趣惡趣死生識，此由有支熏習種子。

癸三、釋虛妄分別所攝

由此諸識，一切界趣雜染所攝依他起相虛妄分別，皆得顯現。如此諸識，皆是虛妄分別所攝，唯識爲性。是無所有，非真實義，顯現所依。

辛二、結

如是名爲依他起相。

庚二、徧計所執（分二：辛一、問。辛二、答）

辛一、問

此中何者徧計所執相？

辛二、答

謂於無義唯有識中，似義顯現。

庚三、圓成實相（分二：辛一、問。辛二、答）

辛一、問

此中何者圓成實相？

辛二、答

謂即於彼依他起相，由似義相，永無有性。

己二、廣釋二相（分二：庚一、廣依他起。庚二、廣徧計所執）

庚一、廣依他起（分二：辛一、釋。辛二、成）

辛一、釋（分二：壬一、釋十一識。壬二、釋唯有識）

壬一、釋十一識（分二：癸一、自性。癸二、差別）

癸一、自性

此中身身者受者識，應知即是眼等六內界。彼所受識，應知即是色等六外界。彼能受識，應知即是眼等六識界。

癸二、差別

其餘諸識，應知是此諸識差別。

壬二、釋唯有識（分二：癸一、辨無義。癸二、解妨難）

癸一、辨無義（分三：子一、牒標。子二、喻顯。子三、比成）

子一、牒標

又此諸識，皆唯有識，都無義故。

子二、喻顯（分二：丑一、問。丑二、答）

丑一、問

此中以何爲喻顯示？

丑二、答（分三：寅一、舉喻。寅二、正釋。寅三、釋難）

寅一、舉喻

應知夢等爲喻顯示。

寅二、正釋（分二：卯一、釋夢喻。卯二、釋等言）

卯一、釋夢喻（分二：辰一、釋喻。辰二、合法）

辰一、釋喻

謂如夢中，都無其義，獨唯有識。雖種種色、聲、香、味、觸，舍、林、地、山，似義影現，而於此中都無有義。

辰二、合法

由此喻顯，應隨了知一切時處，皆唯有識。

卯二、釋等言

由此等言，應知復有幻誑、鹿愛、翳眩等喻。

寅三、釋難（分二：卯一、難。卯二、釋）

卯一、難

若於覺時，一切時處，皆如夢等，唯有識者，如從夢覺，便覺夢中皆唯有識，覺時何故不  
如是轉？

卯二、釋（分二：辰一、標答。辰二、例齊）

辰一、標答

真智覺時，亦如是轉。

辰二、例齊

如在夢中，此覺不轉；從夢覺時，此覺乃轉。如是未得真智覺時，此覺不轉；得真智覺，  
此覺乃轉。

子三、比成（分三：丑一、問。丑二、答。丑三、結）

丑一、問

其有未得真智覺者，於唯識中，云何比知？

丑二、答（分二：寅一、標。寅二、釋）  
寅一、標

由教及理，應可比知。

寅二、釋（分二：卯一、教。卯二、理）  
卯一、教（分二：辰一、十地經。辰二、解深密經）  
辰一、十地經

此中教者，如《十地經》薄伽梵說：如是三界，皆唯有心。

辰二、解深密經（分二：巳一、舉經。巳二、引文）  
巳一、舉經

又薄伽梵《解深密經》亦如是說。

巳二、引文（分二：午一、第一問答。午二、第二問答）  
午一、第一問答（分二：未一、舉事問。未二、依理答）  
未一、舉事問

謂彼經中茲氏菩薩問世尊言：諸三摩地所行影像，彼與此心，當言有異？當言無異？

未二、依理答

佛告茲氏：當言無異。何以故？由彼影像，唯是識故。我說識所緣，唯識所現故。

午二、第二問答（分二：未一、設難更問。未二、釋理重答）

未一、設難更問

世尊！若三摩地所行影像即與此心無有異者，云何此心還取此心？

未二、釋理重答（分三：申一、正釋。申二、舉喻。申三、合法）

申一、正釋

茲氏！無有少法，能取少法。然即此心如是生時，即有如是影像顯現。

申二、舉喻

如質為緣，還見本質，而謂我今見於影像，及謂離質別有所見影像顯現。

申三、合法

此心亦爾。如是生時，相似有異所見影現。

卯二、理（分二：辰一、乘標。辰二、徵釋）  
辰一、乘標

即由此教，理亦顯現。

辰二、徵釋（分二：巳一、徵。巳二、釋）  
巳一、徵

所以者何？

巳二、釋（分二：午一、約定心辨。午二、約憶持識辨）  
午一、約定心辨（分三：未一、舉事。未二、顯理。未三、簡非）  
未一、舉事

於定心中，隨所觀見諸青瘀等所知影像，一切無別青瘀等事，但見自心。

未二、顯理

由此道理，菩薩於其一切識中，應可比知皆唯有識，無有境界。

未三、簡非

又於如是青瘀等中，非憶持識。見所緣境現前住故。

午二、約憶持識辨

聞思所成二憶持識，亦以過去爲所緣故，所現影像，得成唯識。

丑三、結

由此比量，菩薩雖未得真智覺，於唯識中，應可比知。

癸二、解妨難（分二：子一、有色非識難。子二、色相非心難）

子一、有色非識難（分二：丑一、結前起難。丑二、例前答釋）

丑一、結前起難

如是已說種種諸識，如夢等喻。即於此中，眼識等識可成唯識。眼等諸識，既是有色，亦唯有識，云何可見？

丑二、例前答釋

此亦如前，由教及理。

子二、色相非心難（分二：丑一、難。丑二、釋）

丑一、難

若此諸識，亦體是識，何故乃似色性顯現，一類堅住，相續而轉？

丑二、釋（分二：寅一、長行。寅二、頌）

寅一、長行（分三：卯一、標所須因。卯二、逐理徵責。卯三、結成正義）

卯一、標所須因

與顛倒等諸雜染法為依處故。

卯二、逐理徵責

若不爾者，於非義中起義顛倒，應不得有。此若無者，煩惱、所知二障雜染，應不得有。

此若無者，諸清淨法，亦應無有。

卯三、結成正義

是故諸識，應如是轉。

寅二、頌

此中有頌：

亂相及亂體，應許爲色識，

及與非色識，若無餘亦無。

辛二、成（分二：壬一、成十一識。壬二、成唯識性）

壬一、成十一識（分二：癸一、成和合轉。癸二、成差別轉）

癸一、成和合轉（分二：子一、問。子二、答）

子一、問

何故身身者受者識、所受識、能受識，於一切身中，俱有和合轉？

子二、答

能圓滿生，受用所顯故。

癸二、成差別轉（分二：子一、總問。子二、別答）

子一、總問

何故如說世等諸識差別而轉？

子二、別答

無始時來，生死流轉無斷絕故；諸有情界，無數量故；諸器世界，無數量故；諸所作事，展轉言說，無數量故；各別攝取，受用差別，無數量故；諸愛、非愛業果異熟，受用差別，無數量故；所受死生種種差別，無數量故。

壬三、成唯識性（分三：癸一、問。癸二、答。癸三、結）

癸一、問

復次，云何安立如是諸識成唯識性？

癸二、答（分二：子一、標釋三相。子二、廣辨三相）

子一、標釋三相

略由三相：一、由唯識，無有義故；二、由二性，有相有見二識別故；三、由種種，種種行相而生起故。

子二、廣辨三相（分二：丑一、徵。丑二、釋）

丑一、徵

所以者何？

丑二、釋（分四：寅一、辨唯一相。寅二、辨具二相。寅三、辨具三相。  
寅四、辨立義識）

寅一、辨唯一相

此一切識，無有義故，得成唯識。

寅二、辨具二相

有相見故，得成二種。若眼等識，以色等識為相，以眼識識為見，乃至以身識識為見。

寅三、辨具三相（分二：卯一、顯自意識。卯二、敘一類計）

卯一、顯自意識（分二：辰一、長行。辰二、頌）

辰一、長行（分二：巳一、標。巳二、釋）

巳一、標

若意識，以一切眼為最初，法為最後，諸識為相，以意識識為見。

巳二、釋

由此意識有分別故，似一切識而生起故。

辰二、頌

此中有頌：

唯識二種種，觀者意能入。

由悟入唯心，彼亦能伏離。

卯二、敘一類計（分四：辰一、說一意識。辰二、釋伏難辰。三、舉例成。  
辰四、引教證）

辰一、說一意識（分二：巳一、標立。巳二、舉喻）

巳一、標立

又於此中，有一類師說一意識，彼彼依轉，得彼彼名。

巳二、舉喻

如意思業，名身語業。

辰二、釋伏難（分二：巳一、標。巳二、釋）

巳一、標

又於一切所依轉時，似種種相二影像轉。

巳二、釋

謂唯義影像，及分別影像。

辰三、舉例成（分二：巳一、舉事。巳二、釋例）

巳一、舉事

又一切處，亦似所觸影像而轉。

巳二、釋例

有色界中，即此意識依止身故。如餘色根，依止於身。

辰四、引教證（分三：巳一、頌難調心。巳二、說根境界意能受。

巳三、說名意處）

巳一、頌難調心

此中有頌：

若遠行獨行，無身寐於窟，調此難調心，我說真梵志。

巳二、說根境界意能受等

又如經言：如是五根所行境界，意各能受，意爲彼依。

巳三、說名意處

又如所說十二處中，說六識身，皆名意處。

寅四、辨立義識（分二：卯一、立相見識。卯二、釋見依相）

卯一、立相見識

若處安立阿賴耶識，識爲義識。應知此中，餘一切識是其相識。若意識識及所依止，是其見識。

卯二、釋見依相

由彼相識是此見識生緣相故，似義現時，能作見識生依止事。

癸三、結

如是名爲安立諸識成唯識性。

庚二、廣徧計所執（分二：辛一、牒前問。辛二、舉教答）

辛一、牒前問

諸義現前，分明顯現。而非是有。云何可知？

辛二、舉教答（分二：壬一、引經。壬二、證成）

壬一、引經（分二：癸一、標成四法。癸二、隨標別釋）

癸一、標成四法

如世尊言：若諸菩薩成就四法，能隨悟入一切唯識，都無有義。

癸二、隨標別釋（分四：子一、相違識相智。子二、無所緣識智。

子三、自應無顛倒智。子四、隨三智轉智）

子一、相違識相智

一者，成就相違識相智。如餓鬼、傍生及諸天、人同於一事。見彼所識有差別故。

子二、無所緣識智

二者，成就無所緣識現可得智。如過去、未來，夢影緣中有所得故。

子三、自應無顛倒智

三者，成就應離功用無顛倒智。如有義中，能緣義識應無顛倒。不由功用，智真實故。

子四、隨三智轉智（分三：丑一、標。丑二、徵。丑三、釋）

丑一、標

四者，成就三種勝智隨轉妙智。

丑二、徵

何等爲三？

丑三、釋（分三：寅一、隨自在者智轉智。寅二、隨觀察者智轉智。

寅三、隨無分別智轉智）

寅一、隨自在者智轉智

一，得心自在一切菩薩得靜慮者，隨勝解力，諸義顯現。

寅二、隨觀察者智轉智

二，得奢摩他修法觀者，纔作意時，諸義顯現。

寅三、隨無分別智轉智

三，已得無分別智者，無分別智現在前時，一切諸義皆不顯現。

壬二、證成

由此所說三種勝智隨轉妙智，及前所說三種因緣，諸義、無義，道理成就。

戊二、釋名（分二：己一、略釋三性。己二、廣所執性）

己一、略釋三性（分三：庚一、依他起性。庚二、徧計所執性。庚三、圓成實性）

庚一、依他起性（分二：辛一、問所解法及所釋詞。辛二、答所釋詞攝所解法）

辛一、問所解法及所釋詞

若依他起自性，實唯有識，似義顯現之所依止。云何成依他起？何因緣故，名依他起？

辛二、答所釋詞攝所解法（分二：壬一、由依他生。壬二、由依他住）

壬一、由依他生

從自熏習熏子所生，依他緣起故，名依他起。

壬二、由依他住

生剎那後，無有功能自然住故，名依他起。

庚二、徧計所執性（分二：辛一、問所解法及所釋詞。辛二、答所釋詞攝所解法）

辛一、問所解法及所釋詞

若徧計所執自性，依依他起，實無所有似義顯現。云何成徧計所執？何因緣故，名徧計所執？

辛二、答所釋詞攝所解法（分二：壬一、由生顛倒。壬二、由無自體）  
壬一、由生顛倒

無量行相意識徧計，顛倒生相故，名徧計所執。

壬二、由無自體

自相實無，唯有徧計所執可得，是故說名徧計所執。

庚三、圓成實性（分二：辛一、問所解法及所釋詞。辛二、答所釋詞攝所解法）  
辛一、問所解法及所釋詞

若圓成實自性，是徧計所執永無有相。云何成圓成實？何因緣故，名圓成實？

辛二、答所釋詞攝所解法（分二：壬一、由無變異性。壬一、由無變異性）  
壬一、由無變異性

由無變異性故，名圓成實。

壬二、由最勝義

又由清淨所緣性故，一切善法最勝性故，由最勝義，名圓成實。

己二、廣所執性（分二：庚一、顯二徧計成所執性。庚二、釋由品類能徧計度）

庚一、顯二徧計成所執性（分二：辛一、總標。辛二、徵釋）

辛一、總標

復次，有能徧計，有所徧計，徧計所執自性乃成。

辛二、徵釋（分二：壬一、別徵。壬二、隨釋）

壬一、別徵

此中何者能徧計？何者所徧計？何者徧計所執自性？

壬二、隨釋（分三：癸一、能徧計。癸二、所徧計。癸三、徧計所執自性）

癸一、能徧計（分二：子一、出意識體。子二、釋有分別）

子一、出意識體

當知意識是能徧計。有分別故。

子二、釋有分別（分二：丑一、徵。丑二、釋）

丑一、徵

所以者何？

丑二、釋（分二：寅一、顯二因生。寅二、顯名徧計）

寅一、顯二因生

由此意識，用自名言熏習為種子，及用一切識名言熏習為種子，是故意識，無邊行相分別而轉。

寅二、顯名徧計

普於一切分別計度，故名徧計。

癸二、所徧計

又依他起自性，名所徧計。

癸三、徧計所執自性（分二：子一、成所執性。子二、釋由此相）

子一、成所執性

又若由此相，令依他起自性成所徧計，此中是名徧計所執自性。

子二、釋由此相

由此相者，是如此義。

庚二、釋由品類能徧計度（分二：辛一、問。辛二、答）

辛一、問（分二：壬一、總問。壬二、別問）

壬一、總問

復次，云何徧計能徧計度？

壬二、別問

緣何境界？取何相貌？由何執著？由何起語？由何言說？何所增益？

辛二、答（分二：壬一、別答。壬二、總答）

壬一、別答

謂緣名為境；於依他起自性中取彼相貌；由見執著；由尋起語；由見、聞等四種言說而起

言說；於無義中增益為有。

壬二、總答

由此徧計，能徧計度。

戊三、釋一異（分二：己一、問己。二、答）

己一、問

復次，此三自性爲異、爲不異？

己二、答（分三：庚一、雙非。庚二、依一自性標三異門。庚三、別釋三性成異門義）

庚一、雙非

應言非異非不異。

庚二、依一自性標三異門

謂依他起自性，由異門故，成依他起。即此自性，由異門故，成徧計所執。即此自性，由異門故，成圓成實。

庚三、別釋三性成異門義（分三：辛一、成依他起。辛二、成徧計所執。辛三、成圓成實）

辛一、成依他起（分二：壬一、徵。壬二、釋）

壬一、徵

由何異門，此依他起成依他起？

壬二、釋

依他熏習種子起故。

辛二、成徧計所執（分二：壬一、徵。壬二、釋）  
壬一、徵

由何異門，即此自性成徧計所執？

壬二、釋

由是徧計所緣相故；又是徧計所徧計故。

辛三、成圓成實（分二：壬一、徵。壬二、釋）  
壬一、徵

由何異門，即此自性成圓成實？

壬二、釋

如所徧計，畢竟不如是有故。

戊四、辨品類（分二：己一、略釋三性。己二、廣執所依）  
己一、略釋三性（分二：庚一、總問。庚二、別答）  
庚一、總問

此三自性，各有幾種？

庚二、別答（分三：辛一、依他起。辛二、徧計所執。辛三、圓成實）

辛一、依他起（分二：壬一、標。壬二、釋）

壬一、標

謂依他起略有二種：

壬二、釋

一者，依他薰習種子而生起故；二者，依他雜染、清淨性不成故。由此二種依他別故，名依他起。

辛二、徧計所執（分二：壬一、標。壬二、釋）

壬一、標

徧計所執，亦有二種：

壬二、釋

一者，自性徧計執故；二者，差別徧計執故。由此故名徧計所執。

辛三、圓成實（分二：壬一、標。壬二、釋）

壬一、標

圓成實性，亦有二種：

壬二、釋

一者，自性圓成實故；二者，清淨圓成實故。由此故成圓成實性。

己二、廣執所依（分二：庚一、廣徧計。庚二、廣分別）

庚一、廣徧計（分二：辛一、出四種。辛二、出五種）

辛一、出四種（分二：壬一、略標列。壬二、隨難釋）

壬一、略標列

復次，徧計有四種：一、自性徧計，二、差別徧計，三、有覺徧計，四、無覺徧計。

壬二、隨難釋

有覺者，謂善名言；無覺者，謂不善名言。

辛二、出五種（分二：壬一、標數。壬二、列釋）

壬一、標數

如是徧計復有五種：

壬二、列釋（分五：癸一、依名計義。癸二、依義計名。癸三、依名計名。

癸四、依義計義。癸五、依二計二）

癸一、依名計義

一、依名徧計義自性，謂如是名有如是義。

癸二、依義計名

二、依義徧計名自性，謂如是義有如是名。

癸三、依名計名

三、依名徧計名自性，謂徧計度，未了義、名。

癸四、依義計義

四、依義徧計義自性，謂徧計度，未了名、義。

癸五、依二計二

五、依二徧計二自性，謂徧計度此名此義，如是體性。

庚二、廣分別（分二：辛一、標數。辛二、列釋）

辛一、標數

復次，總攝一切分別，略有十種：

辛二、列釋（分十：壬一、根本分別。壬二、緣相分別。壬三、顯相分別。

壬四、緣相變分別。壬五、顯相變異分別。壬六、他引分別。

壬七、不如理分別。壬八、如理分別。壬九、執著分別。

壬十、散動分別）

壬一、根本分別

一、根本分別，謂阿賴耶識。

壬三、緣相分別

二、緣相分別，謂色等識。

壬三、顯相分別

三、顯相分別，謂眼識等，井所依識。

壬四、緣相變異分別

四、緣相變異分別，謂老等變異，樂受等變異，貪等變異，逼害時節代謝等變異，捺落迦等諸趣變異。及欲界等諸界變異。

壬五、顯相變異分別

五、顯相變異分別，謂即如前所說變異，所有變異。

壬六、他引分別

六、他引分別，謂聞非正法類，及聞正法類分別。

壬七、不如理分別

七、不如理分別，謂諸外道，聞非正法類分別。

壬八、如理分別

八、如理分別，謂正法中，聞正法類分別。

壬九、執著分別

九、執著分別，謂不如理作意類，薩迦耶見爲本，六十二見趣相應分別。

壬十、散動分別（分二：癸一、標。癸二、釋）

癸一、標

十、散動分別，謂諸菩薩十種分別。

癸二、釋（分二：子一、列十散動。子二、顯成對治）

子一、列十散動

一、無相散動；二、有相散動；三、增益散動；四、損減散動；五、一性散動；六、異性散動；七、自性散動；八、差別散動；九、如名取義散動；十、如義取名散動。

子二、顯成對治（分二：丑一、明所為。丑二、明具攝）

丑一、明所為

爲對治此十種散動，一切般若波羅蜜多中說無分別智。

丑二、明具攝

如是所治、能治，應知具攝般若波羅蜜多義。

戊五、釋妨難（分三：己一、異門無別難。己二、名不稱體難。己三、依他都無難）

己一、異門無別難（分二：庚一、難。庚二、釋）

庚一、難

若由異門，依他起自性有三自性，云何三自性，不成無差別？

庚二、釋（分三：辛一、成依他起。辛二、成徧計所執。辛三、成圓成實）

辛一、成依他起（分二：壬一、標。壬二、簡）

壬一、標

若由異門成依他起，

壬二、簡

不即由此成徧計所執，及圓成實。

辛二、成徧計所執（分二：壬一、標。壬二、簡）

壬一、標

若由異門成徧計所執。

壬二、簡

不即由此成依他起，及圓成實。

辛三、成圓成實（分二：壬一、標。壬二、簡）

壬一、標

若由異門成圓成實。

壬三、簡

不即由此成依他起，及徧計所執。

己二、名不稱體難（分二：庚一、難。庚二、釋）

庚一、難

復次，云何得知如依他起自性，徧計所執自性顯現而非稱體？

庚二、釋（分二：辛一、長行。辛二、頌）

辛一、長行（分三：壬一、稱體相違失。壬二、多體相違失。壬三、雜體相違失）

壬一、稱體相違失

由名前覺無，稱體相違故。

壬二、多體相違失

由名有眾多，多體相違故。

壬三、雜體相違失

由名不決定，雜體相違故。

辛二、頌（分二：壬一、重述前義。壬二、喻釋二疑）

壬一、重述前義

此中有二頌：

由名前覺無，多名不決定，

成稱體多體，雜體相違故。

壬二、喻釋二疑

法無而可得，無染而有淨，

應知如幻等，亦復似虛空。

己三、依他都無難（分二：庚一、難。庚二、釋）

庚一、難

復次，何故如所顯現實無所有，而依他起自性，非一切一切都無所有？

庚二、釋（分二：辛一、長行。辛二、頌）

辛一、長行（分二：壬一、逐責成過。壬二、結成非無）

壬一、逐責成過

此若無者，圓成實自性亦無所有。此若無者，則一切皆無。若依他起及圓成實自性無有，應成無有染淨過失。

壬二、結成非無

既現可得雜染清淨，是故不應一切皆無。

辛二、頌

此中有頌：

若無依他起，圓成實亦無，

一切種若無，恒時無染淨。

戊六、釋契經（分三：己一、釋說三自性教。己二、辨隨決了一切佛言。己三、論造大乘法釋）

己一、釋說三自性教（分二：庚一、釋顯說。庚二、釋密意）

庚一、釋顯說（分三：辛一、標說方廣。辛二、引釋三性。辛三、釋依他喻）

辛一、標說方廣

諸佛世尊，於大乘中說方廣教。

辛二、引釋三性（分二：壬一、長行。壬二、頌）

壬一、長行（分三：癸一、徧計所執自性。癸二、依他起自性。癸三、圓成實自性）

癸一、徧計所執自性

彼教中言：云何應知徧計所執自性？應知異門說無所有。

癸二、依他起自性

云何應知依他起自性？應知譬如幻炎夢像、光影谷響、水月變化。

癸三、圓成實自性（分三：子一、設問標答。子二、更徵。子三、別釋）

子一、設問標答

云何應知圓成實自性？應知宣說四清淨法。

子二、更徵

何等名為四清淨法？

子三、別釋（分三：丑一、列名出體。丑二、簡非二性。丑三、明攝一切）

丑一、列名出體（分四：寅一、自性清淨。寅二、離垢清淨。

寅三、得此道清淨。寅四、生此境清淨）

寅一、自性清淨

一者，自性清淨。謂真如、空、實際、無相、勝義、法界。

寅二、離垢清淨

二者，離垢清淨。謂即此離一切障垢。

寅三、得此道清淨

三者，得此道清淨。謂一切菩提分法、波羅蜜多等。

寅四、生此境清淨

四者，生此境清淨。謂諸大乘妙正法教。

丑二、簡非二性

由此法教清淨緣故，非徧計所執自性。最淨法界等流性故，非依他起自性。

丑三、明攝一切

如是四法，總攝一切清淨法盡。

壬二、頌（分二：癸一、頌三自性。癸二、頌四清淨）

癸一、頌三自性

此中有二頌：

幻等說於生，說無計所執，

若說四清淨，是謂圓成實。

癸二、頌四清淨

自性與離垢，清淨道所緣，

一切清淨法，皆四相所攝。

辛三、釋依他喻（分四：壬一、牒前起問。壬二、標為總答。

壬三、乘前更徵。壬四、別釋八喻）

壬一、牒前起問

復次何緣。如經所說，於依他起自性說幻等喻？

壬二、標為總答

於依他起自性，為除他虛妄疑故。

壬三、乘前更徵

他復云何於依他起自性，有虛妄疑？

壬四、別釋八喻（分八：癸一、幻事喻。癸二、陽焰喻。癸三、所夢喻。

癸四、影像喻。癸五、光影喻。癸六、谷響喻。

癸七、水月喻。癸八、變化喻）

癸一、幻事喻

由他於此有如是疑：云何實無有義，而成所行境界？爲除此疑，說幻事喻。

癸二、陽焰喻

云何無義，心心法轉？爲除此疑，說陽焰喻。

癸三、所夢喻

云何無義，有愛、非愛受用差別？爲除此疑，說所夢喻。

癸四、影像喻

云何無義，淨、不淨業，愛、非愛果，差別而生？爲除此疑，說影像喻。

癸五、光影喻

云何無義，種種識轉？爲除此疑，說光影喻。

癸六、谷響喻

云何無義，種種戲論言說而轉？爲除此疑，說谷響喻。

癸七、水月喻

云何無義，而有實取諸三摩地所行境轉？爲除此疑，說水月喻。

癸八、變化喻

云何無義，有諸菩薩，無顛倒心，為辦有情諸利樂事，故思受生？為除此疑，說變化喻。

庚二、釋密意（分三：辛一、梵問經。辛二、阿毘達磨經。辛三、餘經）

辛一、梵問經（分四：壬一、引經問。壬二、標意答。壬三、重徵。壬四、更釋）

壬一、引經問

世尊依何密意，於《梵問經》中說：如來不得生死，不得涅槃？

壬二、標意答

於依他起自性中，依徧計所執自性及圓成實自性，生死、涅槃無差別密意。

壬三、重徵

何以故？

壬四、更釋

即此依他起自性，由徧計所執分成生死，由圓成實分成涅槃故。

辛二、阿毘達磨經（分四：壬一、引經問。壬二、標意答。壬三、徵喻顯義。

壬四、喻金土藏）

壬一、引經問

《阿毘達磨大乘經》中，薄伽梵說法有三種：一、雜染分，二、清淨分，三、彼二分。依何密意作如是說？

壬三、標意答

於依他起自性中，徧計所執自性是雜染分，圓成實自性是清淨分，即依他起是彼二分。依此密意，作如是說。

壬三、徵喻顯義

於此義中，以何喻顯？

壬四、喻金土藏（分三：癸一、總標。癸二、別顯。癸三、以法合）  
癸一、總標

以金土藏，為喻顯示。

癸二、別顯（分三：子一、舉三法。子二、釋非有及有。子三、釋彼二分）  
子一、舉三法

譬如世間金土藏中，三法可得。一、地界，二、土，三、金。

子二、釋非有及有

於地界中，土非實有，而現可得。金是實有，而不可得。火燒鍊時，土相不現，金相顯現。

子三、釋彼二分

又此地界，土顯現時，虛妄顯現；金顯現時，真實顯現。是故地界，是彼二分。

癸三、以法合（分三：子一、釋虛妄顯現。子二、釋真實顯現。子三、結合彼二分）

子一、釋虛妄顯現

識亦如是。無分別智火未燒時，於此識中，所有虛妄，徧計所執自性，顯現；所有真實，圓成實自性，不顯現。

子二、釋真實顯現

此識若為無分別智火所燒時，於此識中，所有真實，圓成實自性，顯現；所有虛妄，徧計所執自性，不顯現。

子三、結合彼二分

是故，此虛妄分別識，依他起自性，有彼二分。如金土藏中所有地界。

辛三、餘經（分二：壬一、長行。壬二、頌）

壬一、長行（分四：癸一、引經問。癸二、標意答。癸三、例餘一切。癸四、指應隨釋）

癸一、引經問

世尊有處說一切法常，有處說一切法無常，有處說一切法非常非無常。依何密意，作如是說？

癸二、標意答

謂依他起自性，由圓成實性分是常，由徧計所執性分是無常，由彼二分非常非無常。依此密意，作如是說。

癸三、例餘一切

如常、無常、無二，如是苦、樂、無二，淨、不淨、無二，空、不空、無二，我、無我、無二，寂靜、不寂靜、無二，有自性、無自性、無二，生、不生、無二，滅、不滅、無二，本來寂靜、非本來寂靜、無二，自性涅槃、非自性涅槃、無二，生死、涅槃、無二，亦爾。

癸四、指應隨釋

如是等差別，一切諸佛密意語言，由三自性，應隨決了。如前說常、無常等門。

壬五、頌（分五：癸一、說無二義。癸二、說成三分。癸三、說無及有。  
癸四、說無自性。癸五、說成依止）

癸一、說無二義

此中有多頌：

如法實不有，如現非一種，

非法非非法，故說無二義。

癸二、說成三分

依一分開顯，或有或非有，

依二分說言，非有非非有。

癸三、說無及有

如顯現非有，是故說爲無，

由如是顯現，是故說爲有。

癸四、說無自性

自然自體無，自性不堅住，

如執取不有，故許無自性。

癸五、說成依止

由無性故成，後後所依止，

無生滅本寂，自性般涅槃。

己二、辨隨決了一切佛言（分三：庚一、標二四種。庚二、釋四意趣。庚三、釋四秘密）

庚一、標二四種

復有四種意趣、四種秘密，一切佛言，應隨決了。

庚二、釋四意趣（分二：辛一、別釋四種。辛二、結名意趣）

辛一、別釋四種（分四：壬一、平等意趣。壬二、別時意趣。壬三、別義意趣。

壬四、補特伽羅意樂意趣）

壬一、平等意趣

四意趣者：

一、平等意趣。謂如說言：我昔曾於彼時彼分，即名勝觀正等覺者。

壬二、別時意趣

二、別時意趣。謂如說言：若誦多寶如來名者，便於無上正等菩提，已得決定。又如說言：由唯發願，便得往生極樂世界。

壬三、別義意趣

三、別義意趣。謂如說言：若已逢事爾所殞伽河沙等佛，於大乘法方能解義。

壬四、補特伽羅意樂意趣（分二：癸一、舉事。癸二、例餘）

癸一、舉事

四、補特伽羅意樂意趣。謂如爲一補特伽羅先讚布施，後還毀訾。

癸二、例餘

如於布施，如是尸羅，及一分修，當知亦爾。

辛二、結名意趣

如是名爲四種意趣。

庚三、釋四秘密（分四：辛一、令人秘密。辛二、相秘密。  
辛三、對治秘密。辛四、轉變密）

辛一、令人秘密

四秘密者：一、令人秘密。謂聲聞乘中，或大乘中。依世俗諦理，說有補特伽羅，及有諸法自性差別。

辛二、相秘密

二、相秘密。謂於是處，說諸法相，顯三自性。

辛三、對治秘密

三、對治秘密。謂於是處，說行對治八萬四千。

辛四、轉變秘密（分二：壬一、長行。壬二、頌）

壬一、長行

四、轉變秘密。謂於是處，以其別義，諸言諸字即顯別義。

壬二、頌

如有頌言：

覺不堅爲堅，善住於顛倒，

極煩惱所惱，得最上菩提。

己三、論造大乘法釋（分二：庚一、標列三相。庚二、釋說三種）

庚一、標列三相

若有欲造大乘法釋，略由三相，應造其釋。一者，由說緣起；二者，由說從緣所生法相；

三者，由說語義。

庚二、釋說三種（分三：辛一、說緣起。辛二、說緣生法相。辛三、說語義）

辛一、說緣起

此中說緣起者。如說：

言熏習所生，諸法此從彼，異熟與轉識，更互爲緣生。

辛二、說緣生法相（分二：壬一、釋轉識相法。壬二、釋應知相）

壬一、釋轉識相法（分二：癸一、長行。癸二、頌）

癸一、長行（分二：子一、出相見體。子二、顯彼三相）

子一、出相見體

復次，彼轉識相法，有相有見，識為自性。

子二、顯彼三相

又彼以依處為相，徧計所執為相，法性為相。由此顯示三自性相。

癸二、頌

如說：

從有相有見，應知彼三相。

壬二、釋應知相（分二：癸一、長行。癸二、頌）

癸一、長行（分二：子一、問。子二、答）

子一、問

復次，云何應釋彼相？

子二、答（分二：丑一、略顯。丑二、更釋）

丑一、略顯（分二：寅一、顯依他中非有及有。寅二、顯二非得及得同時）

寅一、顯依他中非有及有

謂徧計所執相，於依他起相中實無所有，圓成實相於中實有。

寅二、顯二非得及得同時

由此二種，非有及有，非得及得，未見已見真者同時。

丑二、更釋

謂於依他起自性中，無徧計所執故，有圓成實故，於此轉時，若得彼即不得此，若得此即不得彼。

癸二、頌

如說：

依他所執無，成實於中有，

故得及不得，其中二平等。

辛三、說語義（分二：壬一、釋標二處。壬二、隨標別解）

壬一、釋標二處

說語義者，謂先說初句，後以餘句分別顯示。或由德處，或由義處。

壬二、隨標別解（分二：癸一、長行。癸二、頌）

癸一、長行（分二：子一、由德處。子二、由義處）

子一、由德處（分二：丑一、引經。丑二、釋義）

丑一、引經

由德處者，謂說佛功德，最清淨覺，不二現行，趣無相法，住於佛住，逮得一切佛平等性，到無障處，不可轉法，所行無礙，其所安立不可思議，遊於三世平等法性，其身流布一切世界，於一切法智無疑滯，於一切行成就大覺，於諸法智無有疑惑，凡所現身不可分別，一切菩薩等所求智，得佛無二，住勝彼岸，不相間雜，如來解脫，妙智究竟，證無中邊，佛地平等，極於法界，盡虛空性，窮未來際。

丑二、釋義（分二：寅一、釋說意趣。寅二、釋德種類）

寅一、釋說意趣

最清淨覺者，應知此句，由所餘句分別顯示，如是乃成善說法性。

寅二、釋德種類（分二：卯一、略標。卯二、別顯）

卯一、略標

最清淨覺者，謂佛世尊最清淨覺，應知是佛二十一種功德所攝。

卯二、別顯

謂於所知一向無障轉功德，於有、無、無二相真如最勝清淨能入功德，無功用佛事不休息住功德，於法身中所依意樂作業無差別功德，修一切障對治功德，降伏一切外道功德，生在世間不為世法所礙功德，安立正法功德，授記功德，於一切世界示現受用變化身功德，斷疑功德，令人種種行功德，當來法生妙智功德，如其勝解示現功德，無量所依調伏有情加行功德，平等法身波羅蜜多成滿功德，隨其勝解示現差別佛土功德，三種佛身方處無分限功德，窮生死際常現利益安樂一切有情功德，無盡功德等。

子二、由義處（分二：丑一、引經。丑二、釋義）

丑一、引經

復次，由義處者，如說若諸菩薩成就三十二法，乃名菩薩。謂於一切有情起利益安樂增上意樂故；令人一切智智故；自知我今何假智故；摧伏慢故；堅牢勝意樂故；非假憐愍故；於親、非親平等心故；永作善友，乃至涅槃為後邊故；應量而語故；含笑先言故；無限大悲故；於所受事無退弱故；無厭倦意故；聞義無厭故；於自作罪深見過故；於他作罪不瞋而誨故；於一切威儀中恆修治菩提心故；不憚異熟而行施故；不依一切有趣受持戒故；於諸有情無有恚礙而行忍故；為欲攝受一切善法勤精進故；捨無色界修靜慮故；方便相應修般若故；由四攝事攝方便故；於持戒、破戒善友無二故；以殷重心聽聞正法故；以殷重心住阿練若故；於世雜事不愛樂故；於下劣乘曾不欣樂故；於大乘中深見功德故；遠離惡友故；親近善友故；恆修治四梵住故；常遊戲五神通故；依趣智故；於住正行、不住正行諸有情類不棄捨故；言決定故；重諦實故；大菩提心恆為首故。

丑二、釋義（分二：寅一、釋說意趣。寅二、釋業差別）

寅一、釋說意趣

如是諸句，應知皆是初句差別。謂於一切有情起利益安樂增上意樂。

寅二、釋業差別（分三：卯一、略標。卯二、別顯。卯三、總結）

卯一、略標

此利益安樂增上意樂句，有十六業差別應知。

卯二、別顯

此中十六業者：一、展轉加行業。二、無顛倒業。三、不待他請自然加行業。四、不動壞業。五、無求染業。此有三句差別應知，謂無染繫故；於恩、非恩無愛恚故；於生生中恒隨轉故。六、相稱語身業。此有二句差別應知。七、於樂、於苦、於無二中平等業。八、無下劣業。九、無退轉業。十、攝方便業。十一、厭惡所治業。此有二句差別應知。十二、無間作意業。十三、勝進行業。此有七句差別應知。謂六波羅蜜多正加行故，及四攝事正加行故。十四、成滿加行業。此有六句差別應知，謂親近善士故；聽聞正法故；住阿練若

故；離惡尋思故；作意功德故，此復有二句差別應知；助伴功德故，此復有二句差別應知，十五、成滿業。此有三句差別應知，謂無量清淨故；得大威力故；證得功德故。十六、安立彼業。此有四句差別應知，謂御眾功德故；決定無疑教授教誡故；財法攝一故。無雜染心故。

### 卯三、總結

如是諸句，應知皆是初句差別。

### 癸二、頌

如說：

由最初句故，句別德種類。

由最初句故，句別義差別。

乙三、入所知相分（分二：丙一、結前問後。丙二、標釋正答）

丙一、結前問後

如是已說所知相。入所知相，云何應見？

丙二、標釋正答

丁一、長行（分三：戊一、舉能入識。戊二、說入次第。戊三、現觀差別）

戊一、舉能入識（分二：己一、出識體。己二、成能入）

己一、出識體

多聞熏習所依，非阿賴耶識所攝，如阿賴耶識成種子；如理作意所攝，似法似義而生，似所取事，有見意言。

己二、成能入（分三：庚一、能入人。庚二、能入處。庚三、能入因）

庚一、能入人（分二：辛一、問。辛二、答）

辛一、問

此中誰能悟入所應知相？

辛二、答

大乘多聞熏習相續，已得逢事無量諸佛出現於世，已得一向決定勝解，已善積集諸善根故，善備福智資糧菩薩。

庚二、能入處（分二：辛一、問。辛二、答）

辛一、問

何處能入？

辛二、答（分二：壬一、標列處位。壬二、釋其行相）

壬一、標列處位

謂即於彼有見似法似義意言，大乘法相等所生起勝解行地，見道、修道、究竟道中。

壬二、釋其行相

於一切法唯有識性，隨聞勝解故；如理通達故；治一切障故；離一切障故。

庚三、能入因（分二：辛一、問。辛二、答）

辛一、問

由何能入？

辛二、答（分二：壬一、總標列。壬二、隨難釋）

壬一、總標列

由善根力所住持故。謂三種相練磨心故；斷四處故；緣法義境，止觀恒常，殷重加行，無放逸故。

壬二、隨難釋（分二：癸一、釋練磨心。癸二、釋斷四處）

癸一、釋練磨心（分二：子一、長行。子二、頌）

子一、長行（分三：丑一、初練磨心。丑二、次練磨心。丑三、後練磨心）

丑一、初練磨心（分二：寅一、令住大願。寅二、結名次第）

寅一、令住大願

無量諸世界，無量人有情，剎那剎那證覺無上正等菩提。

寅二、結名次第

是為第一練磨其心。

丑二、次練磨心（分二：寅一、圓修勝行。寅二、結名次第）

寅一、圓修勝行（分二：卯一、省己意樂。卯二、信有堪能）

卯一、省己意樂

由此意樂，能行施等波羅蜜多，我已獲得如是意樂。

卯二、信有堪能

我由此故，少用功力修習施等波羅蜜多，當得圓滿。

寅二、結名次第

是為第二練磨其心。

丑三、後練磨心（分二：寅一、當獲佛果。寅二、結名次第）

寅一、當獲佛果（分二：卯一、舉可愛生。卯二、例勝善滿）

卯一、舉可愛生

若有成就諸有障善，於命終時，即便可愛一切自體圓滿而生。

卯二、例勝善滿

我有妙善無障礙善。云何爾時不當獲得一切圓滿。

寅二、結名次第

是名第三練磨其心。

子二、頌（分三：丑一、初練磨心。丑二、次練磨心。丑三、後練磨心）

丑一、初練磨心

此中有頌：

人趣諸有情，處數皆無量，

念念證等覺，故不應退屈。

丑二、次練磨心

諸淨心意樂，能修行施等，

此勝者已得，故能修施等。

丑三、後練磨心

善者於死時，得隨樂自滿，

勝善由永斷，圓滿云何無？

癸二、釋斷四處（分四：子一、斷劣作意。子二、斷異慧疑。

子三、斷法執。子四、斷分別)

子一、斷劣作意

由離聲聞獨覺作意，斷作意故。

子二、斷異慧疑

由於大乘諸疑離疑，以能永斷異慧疑故。

子三、斷法執

由離所聞、所思法中我、我所執，斷法執故。

子四、斷分別（分二：丑一、長行。丑二、頌）

丑一、長行

由於現前現住安立一切相中，無所作意，無所分別，斷分別故。

丑二、頌

此中有頌：

現前自然住，安立一切相，

智者不分別，得最上菩提。

戊二、說入次第（分二：己一、雙問悟入。己二、依問別答）  
己一、雙問悟入

由何云何而得悟入？

己二、依問別答（分二：庚一、總標意言答由何。問庚二、別顯方便答云何問）  
庚一、總標意言答由何問

由聞熏習種類，如理作意所攝，似法似義有見意言。

庚二、別顯方便答云何問（分二：辛一、勝解行地及見道位。辛二、修道及究竟道位）  
辛一、勝解行地及見道位（分三：壬一、悟入漸次。壬二、悟入義利）  
壬一、悟入漸次（分二：癸一、標由方便。癸二、顯入次第）  
癸一、標由方便（分二：子一、四尋思。子二、四如實智）  
子一、四尋思

由四尋思。謂由名義、自性、差別、假立尋思。

子二、四如實智

及由四種如實徧智。謂由名事、自性、差別、假立如實徧智。如是皆同不可得故。

癸二、顯入次第（分二：子一、入唯識性。子二、入所知相）

子一、入唯識性（分三：丑一、悟入徧計所執性。丑二、悟入依他起性。

丑三、悟入圓成實性）

丑一、悟入徧計所執性（分三：寅一、先標所為。寅二、正顯加行。

寅三、結能悟入）

寅一、先標所為

以諸菩薩，如是如實，爲入唯識，勤修加行。

寅二、正顯加行（分二：卯一、推求。卯二、證得）

卯一、推求

即於似文似義意言，推求文名，唯是意言；推求依此文名之義，亦唯意言；推求名義、自性、差別，唯是假立。

卯二、證得

若時證得唯有意言，爾時證知若名、若義、自性、差別，皆是假立。自性、差別義相無故，同不可得。

寅三、結能悟入

由四尋思，及由四種如實徧智，於此似文似義意言，便能悟入唯有識性。

丑二、悟入依他起性（分二：寅一、乘前雙問。寅二、依問別答）

寅一、乘前雙問

於此悟入唯識性中，何所悟入？如何悟入？

寅二、依問別答（分二：卯一、答何所入。卯二、答如何入）

卯一、答何所入（分二：辰一、標列三性。辰二、釋入所依）

辰一、標列三性

入唯識性，相見二性，及種種性。

辰二、釋入所依

若名若義，自性差別假，自性差別義，如是六種義皆無故；所取、能取性現前故；一時現似種種相義而生起故。

卯二、答如何入（分二：辰一、喻先所執。辰二、喻此依他）  
辰一、喻先所執（分二：巳一、譬繩上蛇。巳二、顯義無有）  
巳一、譬繩上蛇

如闇中繩，顯現似蛇。

巳二、顯義無有

譬如繩上，蛇非真實。以無有故。

辰二、喻此依他（分二：巳一、譬見繩時應滅繩覺。巳二、顯入唯識識覺當除）  
巳一、譬見繩時應滅繩覺（分二：午一、見繩起覺。午二、依細覺除）  
午一、見繩起覺

若已了知彼義無者，蛇覺雖滅，繩覺猶在。

午二、依細覺除

若以微細品類分析，此又虛妄，色、香、味、觸爲其相故。此覺爲依，繩覺當滅。

巳一、顯入唯識識覺當除（分二：午一、除迷亂覺。午二、依真實覺）  
午一、除迷亂覺

如是於彼似文、似義六相意言，伏除非實六相義時，唯識性覺。猶如蛇覺，亦當除遣。

午二、依真實覺

由圓成實自性覺故。

丑三、悟入圓成實性（分二：寅一、結前起問。寅二、顯義正答）  
寅一、結前起問

如是菩薩，悟入意言似義相故，悟入徧計所執性；悟入唯識故，悟入依他起性。云何悟入圓成實性？

寅二、顯義正答（分二：卯一、長行。卯二、頌（意證長行無分別名））  
卯一、長行（分三：辰一、釋先因緣。辰二、顯正現見。辰三、成已悟入）  
辰一、釋先因緣

若已滅除意言聞法熏習種類唯識之想，爾時菩薩已遣義想，一切似義無容得生。故似唯識，亦不得生。

### 辰二、顯正現見

由是因緣，住一切義無分別名，於法界中便得現見相應而住。爾時菩薩平等平等，所緣、能緣無分別智已得生起。

### 辰三、成已悟入

由此菩薩名已悟入圓成實性。

### 卯二、頌（意證長行無分別名）

此中有頌：

法補特伽羅，法義略廣性，

不淨淨究竟，名所行差別。

子三、入所知相（分三：丑一、結前順標。丑二、廣入行相。丑三、出名見道）

丑一、結前順標

如是菩薩悟入唯識性故，悟入所知相。

丑二、廣入行相

悟入此故，入極喜地。善達法界，生如來家，得一切有情平等心性，得一切菩薩平等心性，得一切佛平等心性。

丑三、出名見道

此即名為菩薩見道。

壬三、悟入義利（分二：癸一、問入所須。癸二、以二智答）

癸一、問入所須

復次，為何義故，入唯識性？

癸二、以二智答（分二：子一、總由二智為獲自義。子二、唯由後得善為他說）

子一、總由二智為獲自義

由緣總法出世止觀智故，由此後得種種相識智故，為斷及相阿賴耶識諸相種子，為長能觸法身種子，為轉所依，為欲證得一切佛法，為欲證得一切智智，入唯識性。

子二、唯由後得善為他說

又後得智，於一切阿賴耶識所生一切了別相中，見如幻等，性無倒轉。是故菩薩，譬如幻師於所幻事，於諸相中，及說因果，常無顛倒。

壬三、悟入依止（分二：癸一、問。癸二、答）

癸一、問

於此悟入唯識性時，有四種三摩地，是四種順決擇分依止。云何應知？

癸二、答（分二：子一、顯別依止。子二、明現觀邊）

子一、顯別依止（分二：丑一、由四尋思。丑二、由四如實智）

丑一、由四尋思（分二：寅一、辨煖依止及出定名。寅二、辨頂依止及出定名）

寅一、辨煖依止及出定名

應知由四尋思，於下品無義忍中，有明得三摩地，是暖順決擇分依止。

寅二、辨頂依止及出定名

於上品無義忍中，有明增三摩地，是頂順決擇分依止。

丑二、由四如實智（分二：寅一、辨諦順忍依止及出定名。

寅二、辨世第一法依止及出定名）

寅一、辨諦順忍依止及出定名

復由四種如實徧智，已入唯識，於無義中，已得決定，有人真義一分三摩地，是諦順忍依止。

寅二、辨世第一法依止及出定名

從此無間，伏唯識想，有無間三摩地，是世第一法依止。

子二、明現觀邊

應知如是諸三摩地，是現觀邊。

辛二、修道及究竟道位（分二：壬一、結前起問。壬二、略辨正答）

壬一、結前起問

如是菩薩已入於地，已得見道，已入唯識，於修道中云何修行？

壬二、略辨正答（分二：癸一、先說修道可得轉依。癸二、後明欲證精勤加行）

癸一、先說修道可得轉依（分二：子一、顯意言境及由方便。

子二、顯經長時方得轉依）

子一、顯意言境及由方便

於如所說安立十地攝一切經皆現前中，由緣總法出世，後得止觀智故；

子二、顯經長時方得轉依

經於無量百千俱胝那庾多劫數修習故，而得轉依。

癸二、後明欲證精勤加行

為欲證得三種佛身，精勤修行。

戊三、現觀差別（分二：己一、問。己二、答）

己一、問

聲聞現觀、菩薩現觀、有何差別？

己二、答（分二：庚一、總標數。庚二、別列釋）

庚一、總標數

謂菩薩現觀與聲聞異，由十一種差別應知。

庚二、別列釋

一、由所緣差別，以大乘法爲所緣故；二、由資持差別，以大福智二種資糧爲資持故；三、由通達差別，以能通達補特伽羅法無我故；四、由涅槃差別，攝受無住大涅槃故；五、由地差別，依於十地而出離故；六、七、由清淨差別，斷煩惱習，淨佛土故；八、由於自他得平等心差別，成熟有情加行無休息故；九、由生差別，生如來家故；十、由受生差別，常於諸佛大集會中攝受生故；十一、由果差別，十力、無畏、不共佛法，無量功德果成滿故。

丁二、頌（分二：戊一、自頌前義。戊二、引餘頌證）

戊一、自頌前義（分二：己一、四尋思。己二、四如實智）

己一、四尋思

此中有二頌：

名事互爲客，其性應尋思，

於二亦當推，唯量及唯假。

己二、四如實智

實智觀無義，唯有分別三，

彼無故此無，是即入三性。

戊二、引餘頌證（分二：己一、教授二頌。己二、別五現觀伽陀）

己一、教授二頌（分二：庚一、現觀邊。庚二、真現觀）

庚一、現觀邊（分二：辛一、先遣義想觀唯自心。辛二、印空所取能取亦無）

辛一、先遣義想觀唯自心

復有教授二頌，如《分別瑜伽論》說：

菩薩於定位，觀影唯是心，

義相既滅除，審觀唯自想。

辛二、印空所取能取亦無

如是住內心，知所取非有，次能取亦無，

庚二、真現觀

後觸無所得。

己二、別五現觀伽陀（分五：庚一、顯資糧位。庚二、顯加行位。庚三、顯見道位。  
庚四、顯修道位。庚五、顯究竟位）

庚一、顯資糧位

復有別五現觀伽他，如《大乘經莊嚴論》說：

福德智慧二資糧，菩薩善備無邊際。

庚二、顯加行位（分二：辛一、明所悟入。辛二、遣似唯識）

辛一、明所悟入（分三：壬一、悟入徧計所執性。壬二、悟入依他起性。  
壬三、順入圓成實性）

壬一、悟入徧計所執性

於法思量善決已，故了義趣唯言類。

壬二、悟入依他起性

若知諸義唯是言，即住似彼唯心理。

壬三、順入圓成實性

便能現證真法界，是故二相悉蠲除。

辛二、遣似唯識

體知離心無別物，由此即會心非有。

庚三、顯見道位

智者了達二皆無，等住二無真法界。

庚四、顯修道位

慧者無分別智力，周徧平等常順行。

滅依榛梗過失聚，如大良藥銷眾毒。

庚五、顯究竟位

佛說妙法善成立，安慧並根法界中。

了知念趣唯分別，勇猛疾歸德海岸。

乙四、彼入因果分（分二：丙一、結前問後。丙二、標釋正答）

丙一、結前問後

如是已說人所知相。彼入因果，云何可見？

丙二、標釋正答（分二：丁一、牒前總標。丁二、依標別釋）

丁一、牒前總標

謂由施、戒、忍、精進、靜慮、般若六種波羅蜜多。

丁二、依標別釋（分二：戊一、略辨二位。戊二、廣顯十門）

戊一、略辨二位（分二：己一、雙問徵起。己二、別答顯位）

己一、雙問徵起

云何由六波羅蜜多得入唯識？復云何六波羅蜜多成彼入果？

己二、別答顯位（分二：庚一、地前位。庚二、地上位）

庚一、地前位

謂此菩薩，不著財位，不犯尸羅，於苦無動，於修無懈。於如是等散動因中不現行時，心專一境，便能如理簡擇諸法，得人唯識。

庚二、地上位（分二：辛一、證淨意樂。壬二、釋由修習）

辛一、證淨意樂（分二：壬一、乘前略標。壬二、釋由修習）

壬一、乘前略標

菩薩依六波羅蜜多人唯識已，證得六種清淨增上意樂所攝波羅蜜多。

壬二、釋由修習

是故於此設離六種波羅蜜多，現起加行。由於聖教得勝解故，及由愛重、隨喜、欣樂諸作意故，恒常無間相應方便修習六種波羅蜜多，速得圓滿。

辛二、顯意樂相（分二：壬一、以頌總顯。壬二、長行配釋）

壬一、以頌總顯

此中有三頌：

已圓滿白法，及得利疾忍，菩薩於自乘，甚深廣大教。

等覺唯分別，得無分別智，惟求勝解淨，故意樂清淨。

前及此法流，皆得見諸佛，了知菩提近，以無難得故。

壬二、長行配釋

由此三頌，總顯清淨增上意樂有七種相。謂資糧故，堪忍故，所緣故，作意故，自體故，瑞相故，勝利故。如其次第，諸句伽他應知顯示。

戊二、廣顯十門（分二：己一、長行別釋。己二、頌結集施）

己一、長行別釋（分十：庚一、數。庚二、相。庚三、次第。庚四、訓詞。庚五、修。

庚六、差別。庚七、相攝。庚八、所治。庚九、勝利。庚十、互決擇）

庚一、數（分二：辛一、問。辛二、答）

辛一、問

何因緣故，波羅蜜多唯有六數？

辛二、答（分二：壬一、略標三因。壬二、隨標別釋）

壬一、略標三因

成立對治所治障故，證諸佛法所依處故，隨順成熟諸有情故。

壬二、隨標別釋（分三：癸一、釋第一因。癸二、釋第二因。癸三、釋第三因）

癸一、釋第一因（分二：子一、辨對治障。子二、結成六數）

子一、辨對治障（分三：丑一、治不發趣因。丑二、治退還因。丑三、治失壞因）

丑一、治不發趣因（分二：寅一、明立施戒。寅二、隨釋此因）

寅一、明立施戒

為欲對治不發趣因，故立施、戒波羅蜜多。

寅二、隨釋此因

不發趣因，謂著財位，及著室家。

丑二、治退還因（分二：寅一、明立忍進。寅二、隨釋此因）

寅一、明立忍進

為欲對治雖已發趣復退還因，故立忍、進波羅蜜多。

寅二、隨釋此因

退還因者，謂處生死有情違犯所生眾苦，及於長時善品加行所生疲怠。

丑三、治失壞因（分二：寅一、明立定慧。寅二、隨釋此因）

寅一、明立定慧

為欲對治雖已發趣不復退還而失壞因，故立定、慧波羅蜜多。

寅二、隨釋此因

失壞因者，謂諸散動及邪惡慧。

子二、結成六數

如是成立對治所治障故，唯立六數。

癸二、釋第二因（分二：子一、辨證佛法。子二、結成六數）

子一、辨證佛法

又前四波羅蜜多，是不散動因；次一波羅蜜多，不散動成就。此不散動為依止故，如實等覺諸法真義，便能證得一切佛法。

子二、結成六數

如是證諸佛法所依處故，唯立六數。

癸三、釋第三因（分二：子一、辨成熟他。子二、結成六數）

子一、辨成熟他（分二：丑一、由攝利。丑二、由開悟）

丑一、由攝利（分二：寅一、辨彼勝能。寅二、顯順成熟）

寅一、辨彼勝能

由施波羅蜜多故，於諸有情能正攝受；由戒波羅蜜多故，於諸有情能不毀害，由忍波羅蜜多故，雖遭毀害而能忍受；由精進波羅蜜多故，能助經營彼所應作。

寅二、顯順成熟

即由如是攝利因緣，令諸有情，於成熟事有所堪任。

丑二、由開悟

從此已後，心未定者，令其得定；心已定者，令得解脫；於開悟時，彼得成熟。

子二、結成六數

如是隨順成熟一切有情，唯立六數。應如是知。

庚二、相（分二：辛一、問。辛二、答）

辛一、問

此六種相，云何可見？

辛二、答（分二：壬一、由六最勝。壬二、四句分別）

壬一、由六最勝（分二：癸一、標數。癸二、列釋）

癸一、標數

由六種最勝故。

癸二、列釋（分六：子一、所依。子二、事。子三、處。

子四、方便善巧。子五、迴向。子六、清淨）

子一、所依

一、由所依最勝，謂菩提心為所依故；

子二、事

二、由事最勝，謂具足現行故；

子三、處

三、由處最勝，謂一切有情利益安樂事為依處故；

子四、方便善巧

四、由方便善巧最勝，謂無分別智所攝受故；

子五、迴向

五、由迴向最勝，謂迴向無上正等菩提故；

子六、清淨

六、由清淨最勝，謂煩惱、所知二障無障所集起故。

壬三、四句分別（分二：癸一、舉施問答。癸二、例餘五度）

癸一、舉施問答

若施是波羅蜜多耶？設波羅蜜多是施耶？有施非波羅蜜多。應作四句。

癸二、例餘五度

如於其施。如是於餘波羅蜜多，亦作四句，如應當知。

庚三、次第（分二：辛一、問。辛二、答）

辛一、問

何因緣故，如是六種波羅蜜多此次第說？

辛二、答

謂前波羅蜜多，隨順生後波羅蜜多故。

庚四、訓詞（分二：辛一、問。辛二、答）

辛一、問

復次，此諸波羅蜜多，訓釋名言，云何可見？

辛二、答（分二：壬一、總釋度名。壬二、別釋施等）

壬一、總釋度名

於諸世間，聲聞、獨覺，施等善根最為殊勝，能到彼岸，是故通稱波羅蜜多。

壬二、別釋施等（分六：癸一、施。癸二、戒。癸三、忍。

癸四、精進。癸五、靜慮。癸六、慧）

癸一、施

又能破裂慳吝、貧窮，及能引得廣大財位福德資糧，故名爲施。

癸二、戒

又能息滅惡戒、惡趣，及能取得善趣等持，故名爲戒。

癸三、忍

又能滅盡忿怒、怨讎，及能善住自他安隱，故名爲忍。

癸四、精進

又能遠離所有懈怠、惡不善法，及能出生無量善法，令其增長，故名精進。

癸五、靜慮

又能消除所有散動，及能引得內心安住，故名靜慮。

癸六、慧

又能除遣一切見趣、諸邪惡慧，及能真實品別知法，故名爲慧。

庚五、修（分二：辛一、問。辛二、答）

辛一、問

云何應知修習如是波羅蜜多？

辛二、答（分二：壬一、總釋列。壬二、略廣釋）

壬一、總釋列

應知此修略有五種：一、現起加行修，二、勝解修，三、作意修，四、方便善巧修，五、成所作事修。

壬二、略廣釋（分二：癸一、略釋五修。癸二、廣作意修）

癸一、略釋五修（分二：子一、指前四修。子二、釋成所作事修）

子一、指前四修

此中四修，如前已說。

子二、釋成所作事修

成所作事修者，謂諸如來任運佛事，無有休息，於其圓滿波羅蜜多，復更修習六到彼岸。

癸二、廣作意修（分二：子一、辨彼修相。子二、顯得勝利）

子一、辨彼修相（分二：丑一、總標作意及其意樂。丑二、別釋意樂所攝作意）

丑一、總標作意及其意樂（分二：寅一、出三作意。寅二、列六意樂）

寅一、出三作意

又作意修者，謂修六種意樂所攝愛重、隨喜、欣樂作意。

寅二、列六意樂

一、廣大意樂，二、長時意樂，三、歡喜意樂，四、荷恩意樂，五、大志意樂，六、純善意樂。

丑二、別釋意樂所攝作意（分二：寅一、愛重作意。寅二、隨善作意）

寅一、愛重作意（分二：卯一、顯意樂攝。卯二、結修作意）

卯一、顯意樂攝（分六：辰一、廣大意樂。辰二、長時意樂。辰三、歡喜意樂。辰四、荷恩意樂。辰五、大志意樂。辰六、純善意樂）

辰一、廣大意樂（分二：巳一、別釋意樂。巳二、結名廣大）

巳一、別釋意樂（分二：午一、布施。午二、餘度）

午一、布施

若諸菩薩，乃至若干無數大劫，現證無上正等菩提。經爾所時，一一剎那，假使頓捨一切身命，以殞伽河沙等世界盛滿七寶奉施如來，乃至安坐妙菩提座。如是菩薩布施意樂，猶無厭足。

午二、餘度

經爾所時，一一剎那，假使三千大千世界滿中熾火，於四威儀，常乏一切資生眾具，戒、忍、精進、靜慮、般若心恒現行，乃至安坐妙菩提座，如是菩薩所有戒、忍、精進、靜慮、般若意樂，猶無厭足。

巳二、結名廣大

是名菩薩廣大意樂。

辰二、長時意樂

又諸菩薩，即於此中無厭意樂，乃至安坐妙菩提座，常無間息，是名菩薩長時意樂。

辰三、歡喜意樂

又諸菩薩，以其六種波羅蜜多饒益有情，由此所作，深生歡喜，蒙益有情，所不能及，是名菩薩歡喜意樂。

辰四、荷恩意樂

又諸菩薩，以其六種波羅蜜多饒益有情，見彼於己有大恩德，不見自身於彼有恩，是名菩薩荷恩意樂。

#### 辰五、大志意樂

又諸菩薩，即以如是六到彼岸所集善根，深心迴施一切有情，令得可愛勝果異熟，是名菩薩大志意樂。

#### 辰六、純善意樂

又諸菩薩，復以如是六到彼岸所集善根，共諸有情，迴求無上正等菩提，是名菩薩純善意樂。

#### 卯二、結修作意

如是菩薩，修此六種意樂所攝愛重作意。

#### 寅二、隨善作意

又諸菩薩，於餘菩薩六種意樂修習相應無量善根，深心隨喜。如是菩薩，修此六種意樂所攝隨喜意樂。

### 寅三、欣樂作意

又諸菩薩，深心欣樂一切有情六種意樂所攝六種到彼岸修，亦願自身與此六種到彼岸修恒不相離，乃至安坐妙菩提座。如是菩薩，修此六種意樂所攝欣樂作意。

### 子二、顯得勝利

若有聞此菩薩六種意樂所攝作意修已，但當能起一念信心，尚當發生無量福聚，諸惡業障亦當消滅。何況菩薩？

庚六、差別（分二：辛一、問。辛二、答）

辛一、問

此諸波羅蜜多差別，云何可見？

辛二、答（分二：壬一、總標。壬二、別釋）

壬一、總標

應知一一各有三品。

壬二、別釋（分六：癸一、施。 癸二、戒。 癸三、忍。  
癸四、精進。 癸五、靜慮。 癸六、慧）

癸一、施

施三品者，一、法施，二、財施，三、無畏施。

癸二、戒

戒三品者，一、律儀戒，二、攝善法戒，三、饒益有情戒。

癸三、忍

忍三品者，一、耐怨害忍，二、安受苦忍，三、諦察法忍。

癸四、精進

精進三品者，一、被甲精進，二、加行精進，三、無怯弱、無退轉、無喜足精進。

癸五、靜慮

靜慮三品者，一、安住靜慮，二、引發靜慮，三、成所作事靜慮。

癸六、慧

慧三品者，一、無分別加行慧，二、無分別慧，三、無分別後得慧。

庚七、相攝（分二：辛一、問。辛二、答）  
辛一、問

如是相攝，云何可見？

辛二、答（分二：壬一、標。壬二、釋）  
壬一、標

由此能攝一切善法。

壬二、釋

是其相故，是隨順故，是等流故。

庚八、所治（分二：辛一、問。辛二、答）  
辛一、問

如是所治攝諸雜染，云何可見？

辛二、答

是此相故，是此因故，是此果故。

庚九、勝利（分三：辛一、問。辛二、答。辛三、結）

辛一、問

如是六種波羅蜜多，所得勝利，云何可見？

辛二、答（分二：壬一、明世間勝利。壬二、明出世勝利）

壬一、明世間勝利

謂諸菩薩流轉生死，富貴攝故，大生攝故，大明大屬之所攝故，廣大事業加行成就之所攝故，無諸惱害、性薄塵垢之所攝故，善知一切工論明處之所攝故。

壬二、明出世勝利

勝生無罪，乃至安坐妙菩提座，常能現作一切有情一切義利。

辛三、結

是名勝利。

庚十、互決擇（分四：辛一、舉互決擇意問多種。辛二、顯具一切引經證答。  
辛三、乘徵意趣。辛四、答互助成）

辛一、舉互決擇意問多種

如是六種波羅蜜多，互相決擇，云何可見？

辛二、顯具一切引經證答

世尊於此一切六種波羅蜜多，或有處所以施聲說，或有處所以戒聲說，或有處所以忍聲說，  
或有處所以勤聲說，或有處所以定聲說，或有處所以慧聲說。

辛三、乘徵意趣

如是所說，有何意趣？

辛四、答互助成

謂於一切波羅蜜多修加行中，皆有一切波羅蜜多互相助成，如是意趣。

己二、頌結集施

此中有一偈陀南頌：

數相及次第，訓詞修差別，

攝所治功德，互決擇應知。

乙五、彼修差別分（分二：丙一、結前問後。丙二、標釋正答）  
丙一、結前問後

如是已說彼人因果。彼修差別，云何可見？

丙二、標釋正答（分二：丁一、牒前總標。丁二、依標別釋）  
丁一、牒前總標

由菩薩十地。

丁二、依標別釋（分七：戊一、列十地名。戊二、辨地安立。戊三、釋地名因。  
戊四、辨得差別。戊五、辨修因果。戊六、辨修十度。戊七、辨修圓滿）  
戊一、列十地名（分二：己一、問。己二、答）  
己一、問

何等爲十？

己二、答

一、極喜地，二、離垢地，三、發光地，四、焰慧地，五、極難勝地，六、現前地，七、遠行地，八、不動地，九、善慧地，十、法雲地。

戊二、辨地安立（分二：己一、乘前起問。己二、依義正答）

己一、乘前起問

如是諸地安立爲十，云何可見？

己二、依義正答（分三：庚一、顯為治障。庚二、釋十法界）

庚一、顯為治障（分三：辛一、標。辛二、徵。辛三、釋）

辛一、標

爲欲對治十種無明所治障故。

辛二、徵

所以者何？

辛三、釋

以於十相所知法界，有十無明所治障住。

庚二、釋十法界（分二：辛一、長行。辛二、頌）

辛一、長行（分二：壬一、問。壬二、答）

壬一、問

云何十相所知法界？

壬二、答

謂初地中由徧行義，第二地中由最勝義，第三地中由勝流義，第四地中由無攝受義，第五地中由相續無差別義，第六地中由無雜染清淨義，第七地中由種種法無差別義，第八地中由不增不減義、相自在依止義、土自在依止義，第九地中由智自在依止義，第十地中由業自在依止義，陀羅尼門、三摩地門自在依止義。

辛二、頌（分二：壬一、列十義。壬二、結安立）

壬一、列十義

此中有三頌：

徧行最勝義，及與勝流義，如是無攝義，相續無別義，  
無雜染淨義，種種無別義，不增不減義，四自在依義。

壬二、結安立

法界中有十，不染污無明，治此所治障，故安立十地。

庚三、簡十無明

復次，應知如是無明，於聲聞等非染汙，於諸菩薩是染汙。

戊三、釋地名因（分十：己一、極喜地。己二、離垢地。己三、發光地。己四、焰慧地。

己五、極難勝地。己六、現前地。己七、遠行地。己八、不動地。

己九、善慧地。己十、法雲地）

己一、極喜地（分二：庚一、問。庚二、答）

庚一、問

復次，何故初地說名極喜？

庚二、答

由此最初，得能成辦自、他義利勝功能故。

己二、離垢地（分二：庚一、問。庚二、答）  
庚一、問

何故二地說名離垢？

庚二、答

由極遠離犯戒垢故。

己三、發光地（分二：庚一、問。庚二、答）  
庚一、問

何故三地說名發光？

庚二、答

由無退轉等持等至所依止故，大法光明所依止故。

己四、焰慧地（分二：庚一、問。庚二、答）  
庚一、問

何故四地說名焰慧？

庚二、答

由諸菩提分法焚滅一切障故。

己五、極難勝地（分二：庚一、問。庚二、答）

庚一、問

何故五地名極難勝？

庚二、答

由真諦智與世間智更互相違，合此難合，令相應故。

己六、現前地（分二：庚一、問。庚二、答）

庚一、問

何故六地說名現前？

庚二、答

由緣起智爲所依止，能令般若波羅蜜多現在前故。

己七、遠行地（分二：庚一、問。庚二、答）

庚一、問

何故七地說名遠行？

庚二、答

至功用行最後邊故。

己八、不動地（分二：庚一、問。庚二、答）

庚一、問

何故八地說名不動？

庚二、答

由一切相，有功用行不能動故。

己九、善慧地（分二：庚一、問。庚二、答）

庚一、問

何故九地說名善慧？

庚二、答

由得最勝無礙智故。

己十、法雲地（分二：庚一、問。庚二、答）

庚一、問

何故十地說名法雲？

庚二、答

由得總緣一切法智，含藏一切陀羅尼門、三摩地門，譬如大雲能覆如空廣大障故，又於法身能圓滿故。

戊四、辨得差別（分二：己一、問。己二、答）

己一、問

得此諸地，云何可見？

己二、答（分二：庚一、標由四相。庚二、依標別釋）

庚一、標由四相

由四種相。

庚二、依標別釋（分四：辛一、勝解。辛二、正行。辛三、通達。辛四、成滿）

辛一、勝解

一、得勝解，謂得諸地深信解故；

辛二、正行

二、得正行，謂得諸地相應十種正法行故；

辛三、通達

三、得通達，謂於初地達法界時，徧能通達一切地故；

辛四、成滿

四、得成滿，謂修諸地到究竟故。

戊五、辨修因果（分二：己一、問。己二、答）

己一、問

修此諸地，云何可見？

己二、答（分二：庚一、修因。庚二、修果）

庚一、修因（分三：辛一、標。辛二、徵。辛三、列）

辛一、標

謂諸菩薩於地地中，修奢摩他、毘鉢舍那，由五相修。

辛二、徵

何等爲五？

辛三、列

謂集總修、無相修、無功用修、熾盛修、無喜足修。

庚二、修果（分二：辛一、乘標。辛二、別釋）

辛一、乘標

如是五修，令諸菩薩成辦五果。

辛二、別釋

謂念念中，銷融一切羸重依止；離種種相，得法苑樂；能正了知周徧無量無分限相，大法光明；順清淨分，無所分別，無相現行；為令法身圓滿成辦，能正攝受後後勝因。

戊六、辨修十度（分二：己一、增勝修。己二、修一切）  
己一、增勝修（分二：庚一、總標。庚二、別釋）  
庚一、總標

由增勝故，說十地中別修十種波羅蜜多。

庚二、別釋（分二：辛一、指前六種。辛二、釋後四種）  
辛一、指前六種

於前六地所修六種波羅蜜多，如先已說。

辛二、釋後四種（分二：壬一、列名釋義。壬二、總顯所攝）  
壬一、列名釋義（分四：癸一、方便善巧。癸二、願。癸三、力。癸四、智）  
癸一、方便善巧

後四地中所修四者，一、方便善巧波羅蜜多，謂以前六波羅蜜多所集善根，共諸有情，迴求無上正等菩提故；

癸二、願

二、願波羅蜜多，謂發種種微妙大願，引攝當來波羅蜜多殊勝眾緣故；

癸三、力

三、力波羅蜜多，謂由思擇、修習二力，令前六種波羅蜜多無間現行故；

癸四、智

四、智波羅蜜多，謂由前六波羅蜜多，成立妙智，受用法樂，成熟有情故。

壬二、總顯所攝

又此四種波羅蜜多，應知般若波羅蜜多無分別智、後得智攝。

己二、修一切

又於一切地中，非不修習一切波羅蜜多。如是法門，是波羅蜜多藏之所攝。

戊七、辨修圓滿（分二：己一、長行。己二、頌）

己一、長行（分二：庚一、問。庚二、答）

庚一、問

復次，凡經幾時，修行諸地可得圓滿？

庚二、答（分二：辛一、標。辛二、釋）

辛一、標

有五補特伽羅，經三無數大劫。

辛二、釋（分三：壬一、初劫圓滿。壬二、二劫圓滿。壬三、三劫圓滿）

壬一、初劫圓滿

謂勝解行補特伽羅，經初無數大劫修行圓滿。

壬二、二劫圓滿

清淨增上意樂行補特伽羅，及有相行、無相行補特伽羅，於前六地及第七地，經第二無數

大劫修行圓滿。

壬三、三劫圓滿

即此無功用行補特伽羅，從此已上至第十地，經第三無數大劫，修行圓滿。

己二、頌

此中有頌：

清淨增上力，堅固心昇進，

名菩薩初修，無數三大劫。

乙六、增上戒學分（分二：丙一、結前問後。丙二、標釋正答）

丙一、結前問後

如是已說因果修差別。此中增上戒殊勝云何可見？

丙二、標釋正答（分二：丁一、牒前出體。丁二、略釋殊勝）

丁一、牒前出體

如菩薩地正受菩薩律儀中說。

丁二、略釋殊勝（分三：戊一、標列四種。戊二、依標別釋）

戊一、標列四種

復次，應知略由四種殊勝，故此殊勝。一、由差別殊勝，二、由共不共學處殊勝，三、由廣大殊勝，四、由甚深殊勝。

戊二、依標別釋（分四：己一、差別殊勝。己二、共不共學處殊勝。己三、廣大殊勝）

己一、差別殊勝（分二：庚一、標列三品。庚二、釋建立義）

庚一、標列三品

差別殊勝者，謂菩薩戒有三品別：一、律儀戒，二、攝善法戒，三、饒益有情戒。

庚二、釋建立義

此中律儀戒，應知二戒建立義故；攝善法戒，應知修集一切佛法建立義故；饒益有情戒，應知成熟一切有情建立義故。

己二、共不共學處殊勝（分三：庚一、標共不共。庚二、釋此學處）

庚一、標共不共

共不共學處殊勝者，謂諸菩薩，一切性罪不現行故，與聲聞共；相似遮罪有現行故，與彼不共。

庚二、釋此學處（分二：辛一、簡差別。辛二、舉要義。庚三、結名殊勝）

辛一、簡差別

於此學處，有聲聞犯，菩薩不犯；有菩薩犯，聲聞不犯。菩薩具有身、語、心戒，聲聞唯有身、語、二戒。是故菩薩心亦有犯，非諸聲聞。

辛二、舉要義

以要言之：一切饒益有情無罪身、語、意業，菩薩一切皆應現行，皆應修學。

庚三、結名殊勝

如是應知說名為共不共殊勝。

己三、廣大殊勝（分二：庚一、標數。庚二、列名）

庚一、標數

廣大殊勝者，復由四種廣大故。

庚二、列名

一、由種種無量學處廣大故；二、由攝受無量福德廣大故；三、由攝受一切有情利益安樂  
意樂廣大故；四、由建立無上正等菩提廣大故。

己四、甚深殊勝（分三：庚一、方便善巧業。庚二、現行變化業。庚三、示行本生事）  
庚一、方便善巧業

甚深殊勝者，謂諸菩薩由是品類方便善巧，行殺生等十種作業而無有罪，生無量福，速證  
無上正等菩提。

庚二、現行變化業（分二：辛一、標。辛二、例）  
辛一、標

又諸菩薩現行變化身、語兩業，應知亦是甚深尸羅。

辛二、例

由此因緣，或作國王，示行種種惱有情事，安立有情毘奈耶中。

庚三、示行本生事（分二：辛一、舉例顯。辛二、結令學）  
辛一、舉例顯

又現種種諸本生事，示行逼惱諸餘有情，真實攝受諸餘有情，先令他心深生淨信，後轉成熟。

辛二、結令學

是名菩薩所學尸羅甚深殊勝。

戊三、結略指廣（分二：己一、結略。己二、指廣）

己一、結略

由此略說四種殊勝，應知菩薩尸羅律儀，最為殊勝。

己二、指廣

如是差別菩薩學處，應知復有無量差別。如《毘奈耶瞿沙方廣契經》中說。

乙七、增上心學分（分二：丙一、結前問後。丙二、標釋正答）

丙一、結前問後

如是已說增上戒殊勝。增上心殊勝，云何可見？

丙二、標釋正答（分二：丁一、標列六種。丁二、依標別釋）

丁一、標列六種

略由六種差別應知。一、由所緣差別故，二、由種種差別故，三、由對治差別故，四、由堪能差別故，五、由引發差別故，六、由作業差別故。

丁二、依標別釋（分二：戊一、略釋六種。戊二、廣能引發）

戊一、略釋六種（分六：己一、所緣差別。己二、種種差別。己三、對治差別。

己四、堪能差別。己五、引發差別。己六、作業差別）

己一、所緣差別

所緣差別者，謂大乘法爲所緣故。

己二、種種差別

種種差別者，謂大乘光明集福定王賢守健行等三摩地，種種無量故。

己三、對治差別

對治差別者，謂一切法總相緣智，以楔出楔道理，遣阿賴耶識中一切障麤重故。

己四、堪能差別

堪能差別者，謂住靜慮樂，隨其所欲，即受生故。

己五、引發差別

引發差別者，謂能引發一切世界無礙神通故。

己六、作業差別

作業差別者，謂能振動、熾然、徧滿、顯示、轉變、往來、卷舒，一切色像皆入身中，所往同類，或顯或隱，所作自在，伏他神通，施辯念樂，放大光明，引發如是大神通故。

戊二、廣能引發（分二：己一、十難行。己二、四作業）

己一、十難行（分二：庚一、略釋十難釋。庚二、重釋隨覺難行）

庚一、略釋十難釋（分二：辛一、標數。辛二、列釋）

辛一、標數

又能引發攝諸難行十難行故。十難行者，

辛二、列釋（分十：壬一、自誓難行。壬二、不退難行。壬三、不背難行。

壬四、現前難行。壬五、不染難行。壬六、勝解難行。

壬七、通達難行。壬八、隨覺難行。壬九、不離不染難行。

壬十、加行難行）

壬一、自誓難行

一、自誓難行，誓受無上菩提願故；

壬二、不退難行

二、不退難行，生死眾苦不能退故；

壬三、不背難行

三、不背難行，一切有情雖行邪行，而不棄故；

壬四、現前難行

四、現前難行，怨有情所，現作一切饒益事故。

壬五、不染難行

五、不染難行，生在世間，不為世法所染汙故；

壬六、勝解難行

六、勝解難行，於大乘中雖未了，然於一切廣大甚深生信解故；

壬七、通達難行

七、通達難行，具能通達補特伽羅法無我故；

壬八、隨覺難行

八、隨覺難行，於諸如來所說甚深祕密言詞能隨覺故；

壬九、不離不染難行

九、不離不染難行，不捨生死而不染故；

壬十、加行難行

十、加行難行，能修諸佛安住解脫一切障礙，窮生死際，不作功用，常起一切有情一切義利行故。

庚二、重釋隨覺難行（分二：辛一、牒前起問。辛二、舉經答釋）

辛一、牒前起問

復次，隨覺難行中，於佛何等祕密言詞，彼諸菩薩能隨覺了？

辛二、舉經答釋（分二：壬一、總答。壬二、別釋）

壬一、總答

謂如經言。

壬二、別釋（分三：癸一、約六度釋。癸二、約十不善業道釋）

癸一、約六度釋（分二：子一、問答施。子二、例餘度）

子一、問答施

云何菩薩能行惠施？若諸菩薩無少所施，然於十方無量世界廣行惠施。云何菩薩樂行惠

施？若諸菩薩於一切施都無欲樂。云何菩薩於惠施中深生信解？若諸菩薩不信如來，而行布施。云何菩薩於施策勵？若諸菩薩於惠施中不自策勵。云何菩薩於施耽樂？若諸菩薩無有暫時少有所施。云何菩薩其施廣大？若諸菩薩於惠施中離娑洛想。云何菩薩其施清淨？若諸菩薩殞波陀慳。云何菩薩其施究竟？若諸菩薩不住究竟。云何菩薩其施自在？若諸菩薩於惠施中不自在轉。云何菩薩其施無盡？若諸菩薩不住無盡。

#### 子二、例餘度

如於布施，於戒爲初，於慧爲後，隨其所應，當知亦爾。

#### 癸二、約十不善業道釋

云何能殺生？若斷眾生生死流轉。云何不與取？若諸有情無有與者自然攝取。云何欲邪行？若於諸欲了知是邪而修正行。云何能妄語？若於妄中能說爲妄。云何具戍尼？若能常居最勝空住。云何波魯師？若善安住所知彼岸。云何綺間語？若正說法品類差別云何能貪欲？若有數數欲自證得無上靜慮。云何能瞋恚？若於其心能正憎害一切煩惱。云何能邪

見？若一切處徧行邪性皆如實見。

癸三、約甚深佛法釋（分二：子一、舉經問釋。子二、顯義略答）

子一、舉經問釋

甚深佛法者，云何名爲甚深佛法？此中應釋。

子二、顯義略答（分二：丑一、別釋。丑二、總結）

丑一、別釋

謂常住法是諸佛法，以其法身是常住故。又斷滅法是諸佛法，以一切障永斷滅故。又生起法是諸佛法，以變化身現生起故。又有所得法是諸佛法，八萬四千諸有情行，及彼對治，皆可得故。又有貪法是諸佛法，自誓攝受有貪有情爲己體故。又有瞋法是諸佛法，又有癡法是諸佛法，又異生法是諸佛法，應知亦爾。又無染法是諸佛法，成滿真如，一切障垢不能染故。又無污法是諸佛法，生在世間，諸世間法不能汙故。

丑二、總結

是故說名甚深佛法。

己二、四作業

又能引發修到彼岸、成熟有情、淨佛國土、諸佛法故，應知亦是菩薩等持作業差別。

乙八、增上慧學分（分二：丙一、結前問後。丙二、標釋正答）

丙一、結前問後

如是已說增上心殊勝。增上慧殊勝云何可見？

丙二、標釋正答（分二：丁一、總標。丁二、廣釋）

丁一、總標（分三：戊一、牒前出體。戊二、成立智相。戊三、結名殊勝）

戊一、牒前出體

謂無分別智。

戊二、成立智相

若自性，若所依，若因緣，若所緣，若行相，若任持，若助伴，若異熟，若等流，若出離，若至究竟，若加行無分別後得勝利，若差別，若無分別後得譬喻，若無功用作事，若甚深。

戊三、結名殊勝

應知無分別智，名增上慧殊勝。

丁二、廣釋（分六：戊一、釋名無分別智。戊二、釋成立相。戊三、釋成立因緣。

戊四、會釋契經。戊五、釋簡聲聞。戊六、釋妨難）

戊一、釋名無分別智（分三：己一、略標自性。己二、釋離五相。己三、結得此名）

己一、略標自性

此中無分別智，離五種相以爲自性。

己二、釋離五相

一、離無作意故；二、離過有尋有伺地故；三、離想受滅寂靜故；四、離色自性故；五、

離於真義異計度故。

己三、結得此名

離此五相，應知是名無分別智。

戊二、釋成立相（分二：己一、頌釋一切。己二、釋三智別）

己一、頌釋一切（分十六：庚一、自性。庚二、所依。庚三、因緣。庚四、所緣。

庚五、行相。庚六、任持。庚七、助伴。庚八、異熟。

庚九、等流。庚十、出離。庚十一、至究竟。庚十二、三智勝利。  
庚十三、三智差別。庚十四、一智譬喻。庚十五、無功用作事。  
庚十六、甚深)

#### 庚一、自性

於如所說無分別智成立相中，

復說多頌：

諸菩薩自性，遠離五種相，是無分別智，不異計於真。

#### 庚二、所依

諸菩薩所依，非心而是心，是無分別智，非思義種類。

#### 庚三、因緣

諸菩薩因緣，有言聞熏習，是無分別智，及如理作意。

#### 庚四、所緣

諸菩薩所緣，不可言法性，是無分別智，無我性真如。

庚五、行相（分二：辛一、顯境無相。辛二、釋通疑難）

辛一、顯境無相

諸菩薩行相，復於所緣中，是無分別智，彼所知無相。

辛二、釋通疑難（分二：壬一、成所分別。壬二、成不可言）

壬一、成所分別

相應自性義，所分別非餘，字展轉相應，是謂相應義。

壬二、成不可言

非離彼能詮，智於所詮轉，非詮不同故，一切不可言。

庚六、任持

諸菩薩任持，是無分別智，後所得諸行，為進趣增長。

庚七、助伴

諸菩薩助伴，說為二種道，是無分別智，五到彼岸性。

庚八、異熟

諸菩薩異熟，於佛二會中，是無分別智，由加行證得。

庚九、等流

諸菩薩等流，於後後生中，是無分別智，自體轉增勝。

庚十、出離

諸菩薩出離，得成辦相應，是無分別智，應知於十地。

庚十一、至究竟

諸菩薩究竟，得清淨三身，是無分別智，得最上自在。

庚十二、三智勝利（分三：辛一、加行智。辛二、根本智。辛三、後得智）

辛一、加行智

如虛空無染，是無分別智，種種極重惡，由唯信勝解。

辛二、根本智

如虛空無染，是無分別智，解脫一切障，得成辦相應。

辛三、後得智

如虛空無染，是無分別智，常行於世間，非世法所染。

庚十三、三智差別（分二：辛一、引喻。辛二、配顯）

辛一、引喻（分四：壬一、約無言說及言說喻。壬二、約無了別及了別喻。

壬三、約無分別及分別喻。壬四、約無領受及領受喻）

壬一、約無言說及言說喻

如啞求受義，如啞正受義，如非啞受義，三智譬如如是。

壬二、約無了別及了別喻

如愚求受義，如愚正受義，如非愚受義，二智譬如如是。

壬三、約無分別及分別喻

如五求受義，如五正受義，如末那受義，三智譬如如是。

壬四、約無領受及領受喻

如未解於論，求論受法義，次第譬三智，

辛二、配顯

應知加行等。

庚十四、二智譬喻（分二：辛一、閉目開目喻。辛二、虛空色像喻）

辛一、閉目開目喻

如人正閉目，是無分別智，即彼復開目，後得智亦爾。

辛二、虛空色像喻

應知如虛空，是無分別智，於中現色像，後得智亦爾。

庚十五、無功用作事

如末尼天樂，無思成自事，種種佛事成，常離思亦爾。

庚十六、甚深（分二：辛一、境智甚深。辛二、法性甚深）

辛一、境智甚深

非於此非餘，非智而是智，與境無有異，智成無分別。

辛二、法性甚深

應知一切法，本性無分別，所分別無故，無分別智無。

己二、釋三智別（分三：庚一、加行智。庚二、根本智。庚三、後得智）  
庚一、加行智

此中加行無分別智有三種，謂因緣、引發、數習生差別故。

庚二、根本智

根本無分別智亦有三種，謂喜足、無顛倒、無戲論無分別差別故。

庚三、後得智

後得無分別智有五種，謂通達、隨念、安立、和合、如意思擇差別故。

戊三、釋成立因緣（分二：己一、釋由義無。己二、結成無識）

己一、釋由義無（分四：庚一、由識相相違。庚二、由緣無可得。庚三、由無倒成失。  
庚四、由隨轉有別）

庚一、由識相相違

復有多頌，成立如是無分別智：

鬼傍生人天，各隨其所應，等事心異故，許義非真實。

庚二、由緣無可得

於過去事等，夢像二影中，雖所緣非實，而境相成就。

庚三、由無倒成失

若義義性成，無無分別智，此若無佛果，證得不應理。

庚四、由隨轉有別（分三：辛一、隨自在者智轉。辛二、隨觀察者智轉。

辛三、隨無分別智轉）

辛一、隨自在者智轉

得自在菩薩，由勝解力故，如欲地等成，得定者亦爾。

辛二、隨觀察者智轉

成就簡擇者，有智得定者，思惟一切法，如義皆顯現。

辛三、隨無分別智轉

無分別智行，諸義皆不現，

己二、結成無識

當知無有義，由此亦無識。

戊四、會釋契經（分四：己一、標意。己二、引經。己三、問釋。己四、顯答）

己一、標意

般若波羅蜜多，與無分別智無有差別。

己二、引經

如說菩薩安住般若波羅蜜多，非處相應，能於所餘波羅蜜多修習圓滿。

己三、問釋

云何名為非處相應，修習圓滿？

己四、顯答（分二：庚一、標。庚二、列）

庚一、標

謂由遠離五種處故。

庚二、列

一、遠離外道我執處故；二、遠離未見真如菩薩分別處故；三、遠離生死涅槃二邊處故；  
四、遠離唯斷煩惱障生喜足處故；五、遠離不顧有情利益安樂，住無餘依涅槃界處故。

戊五、釋簡聲聞（分二：己一、問二差別。己二、答由五相）

己一、問二差別

聲聞等智，與菩薩智有何差別？

己二、答由五相（分二：庚一、長行。庚二、頌）

庚一、長行（分二：辛一、標數。辛二、列釋）

辛一、標數

由五種相，應知差別。

辛二、列釋（分五：壬一、由無分別差別。壬二、由非少分差別。壬三、由無住差別。

壬四、由畢竟差別。壬五、由無上差別）

壬一、由無分別差別

一、由無分別差別，謂於蘊等法無分別故。

壬二、由非少分差別

二、由非少分差別，謂於通達真如，入一切種所知境界，普為度脫一切有情，非少分故。

壬三、由無住差別

三、由無住差別，謂無住涅槃為所住故。

壬四、由畢竟差別

四、由畢竟差別，謂無餘依涅槃界中無斷盡故。

壬五、由無上差別

五、由無上差別，謂於此上，無有餘乘勝過此故。

庚二、頌

此中有頌：

諸大悲為體，由五相勝智，世出世滿中，說此最高遠。

戊六、釋妨難（分二：己一、自在無施難。己二、釋由五因緣）

己一、自在無施難

若諸菩薩成就如是增上尸羅、增上質多、增上般若，功德圓滿，於諸財位，得大自在。何故現見有諸有情，匱乏財位？

己二、釋由五因緣（分二：庚一、長行。庚二、頌）

庚一、長行（分二：辛一、別顯。辛二、總結）

辛一、別顯

見彼有情，於諸財位，有重業障故；見彼有情，若施財位，障生善法故；見彼有情，若乏財位，厭離現前故；見彼有情，若施財位，即為積集不善法因故；見彼有情，若施財位，即便作餘無量有情損惱因故。

辛二、總結

是故現見有諸有情，匱乏財位。

庚二、頌

此中有頌：

見業障現前，積集損惱故，現有諸有情，不感菩薩施。

乙九、彼果斷分（分二：丙一、結前問後。丙二、標釋正答）  
丙一、結前問後

如是已說增上慧殊勝。彼果斷殊勝云何可見？

丙二、標釋正答（分二：丁一、略標體相。丁二、廣顯轉依）  
丁一、略標體相（分三：戊一、牒前出體。戊二、成立其相。戊三、重釋一一）  
戊一、牒前出體

斷，謂菩薩無住涅槃。

戊二、成立其相

以捨雜染不捨生死二所依止，轉依為相。

戊三、重釋一一

此中生死，謂依他起性雜染分。涅槃，謂依他起性清淨分。二所依止，謂通二分依他起性。

轉依，謂即依他起性對治起時，轉捨雜染分，轉得清淨分。

丁二、廣顯轉依（分二：戊一、長行）

戊一、長行（分二：己一、略釋六種）

己一、略釋六種（分二：庚一、標數。庚二、列釋）

庚一、標數

又此轉依，略有六種：

庚二、列釋（分六：辛一、損力益能轉。辛二、通達轉。辛三、修習轉。

辛四、果圓滿轉。辛五、下劣轉。辛六、廣大轉）

辛一、損力益能轉

一、損力益能轉，謂由勝解力，聞熏習住故；及由有羞恥，令諸煩惱少分現行、不現行故。

辛二、通達轉

二、通達轉，謂諸菩薩已入大地，於真實、非真實、顯現、不顯現現前住故，乃至六地。

辛三、修習轉

三、修習轉，謂猶有障，一切相不顯現，真實顯現故，乃至十地。

辛四、果圓滿轉

四、果圓滿轉，謂永無障，一切相不顯現，最清淨真實顯現，於一切相得自在故。

辛五、下劣轉

五、下劣轉，謂聲聞等，唯能通達補特伽羅空無我性，一向背生死，一向捨生死故。

辛六、廣大轉

六、廣大轉。謂諸菩薩，兼通達法空無我性，即於生死見為寂靜，雖斷雜染，而不捨故。

己二、校量失德（分二：庚一、同他過失。庚二、成自功德）

庚一、同他過失（分二：辛一、徵。辛二、釋）

辛一、徵

若諸菩薩住下劣轉，有何過失？

辛二、釋

不顧一切有情利益安樂事故，違越一切菩薩法故，與下劣乘同解脫故，是為過失。

庚二、成自功德（分二：辛一、徵。辛二、釋）

辛一、徵

若諸菩薩住廣大轉，有何功德？

辛二、釋

生死法中，以自轉依為所依止得自在故，於一切趣示現一切有情之身；於最勝生及三乘中，種種調伏方便善巧，安立所化諸有情故，是為功德。

戊二、頌（分四：己一、明染淨分。己二、釋此轉依。己三、出能證智。己四、顯所證果）

己一、明染淨分

此中有多頌：

諸凡夫覆真，一向顯虛妄，諸菩薩捨妄，一向顯真實。

己二、釋此轉依

應知顯不顯，真義非真義，轉依即解脫，隨欲自在行。

己三、出能證智

於生死涅槃，若起平等智，爾時由此證，生死即涅槃。

己四、顯所證果

由是於生死，非捨非不捨，亦即於涅槃，非得非不得。

乙十、彼果智分（分二：丙一、結前問後。丙二、標釋正答）

丙一、結前問後

如是已說彼果斷殊勝。彼果智殊勝云何可見？

丙二、標釋正答（分二：丁一、略標。丁二、廣釋）

丁一、略標（分二：戊一、牒前出體。戊二、釋成其相）

戊一、牒前出體

謂由三種佛身，應知彼果智殊勝。一、由自性身，二、由受用身，三、由變化身。

戊二、釋成其相（分三：己一、自性身。己二、受用身。己三、變化身）

己一、自性身

此中自性身者，謂諸如來法身，一切法自在轉所依止故。

己一、受用身

受用身者，謂依法身，種種諸佛眾會所顯清淨佛土，大乘法樂為所受故。

己二、變化身

變化身者，亦依法身，從睹史多天宮現沒，受生受欲，踰城出家，往外道所，修諸苦行，證大菩提，轉大法輪，入大涅槃故。

丁二、廣釋（分二：戊一、十門分別。戊二、釋諸妨難）

戊一、十門分別（分二：己一、嚧柁南頌。己二、長行）

己一、嚧柁南頌

此中說一嚧柁南頌：

相證得自在，依止及攝持，差別德甚深，念業明諸佛。

己二、長行（分十：庚一、相。庚二、證得。庚三、自在。庚四、依止。庚五、攝持。

庚六、差別。庚七、功德。庚八、甚深。庚九、念。庚十、業。）

庚一、相（分二：辛一、徵。辛二、釋）

辛一、徵

諸佛法身，以何為相？

辛二、釋（分二：壬一、標數。壬二、別釋）

壬一、標數

應知法身，略有五相：

壬二、別釋（分五：癸一、轉依為相。癸二、白法所成為相。癸三、無二為相。

癸四、常住為相。癸五、不可思議為相）

癸一、轉依為相（分二：子一、列。子二、釋）

子一、列

一、轉依為相。

子二、釋

謂轉滅一切障雜染分，依他起性故；轉得解脫一切障，於法自在，轉現前清淨分，依他起性故。

癸二、白法所成為相（分二：子一、列。子二、釋）

子一、列

二、白法所成爲相。

子二、釋（分二：丑一、標十自在。丑二、配釋一一）

丑一、標十自在

謂六波羅蜜多圓滿，得十自在故。

丑二、配釋一一

此中壽自在、心自在、眾具自在，由施波羅蜜多圓滿故；業自在、生自在，由戒波羅蜜多圓滿故，勝解自在，由忍波羅蜜多圓滿故；願自在，由精進波羅蜜多圓滿故；神力自在，五通所攝，由靜慮波羅蜜多圓滿故；智自在、法自在，由般若波羅蜜多圓滿故。

癸三、無二爲相（分二：子一、列。子二、釋）

子一、列

三、無二爲相。

子二、釋（分三：丑一，無有、無相。丑二，無有爲、無爲相。

丑三，無異性、一性相）

丑一、無有、無相

謂有、無無二爲相，由一切法無所有故，空所顯相是實有故。

丑二、無有爲、無爲相

有爲、無爲無二爲相，由業、煩惱非所爲故，自在示現有爲相故。

丑三、無異性、一性相（分二：寅一、長行。寅二、頌）

寅一、長行

異性、一性無二爲相，由一切佛所依無差別故，無量相續現等覺故。

寅二、頌（分二：卯一、釋無異一性。卯二、廣非一多相）

卯一、釋無異一性

此中有二頌：

我孰不有故，於中無別依，隨前能證別，故施設有異。

卯二、廣非一多相

種姓異非虛，圓滿無初故，無垢依無別，故非一非多。

癸四、常住為相（分二：子一、列。子二、釋）

子一、列

四、常住為相。

子二、釋

謂真如清淨相故，本願所引故，所應作事無竟期故。

癸五、不可思議為相（分二：子一、列。子二、釋）

子一、列

五、不可思議為相。

子二、釋

謂真如清淨自內證故，無有世間喻能喻故，非諸尋、思所行處故。

庚二、證得（分二：辛一、徵。辛二、釋）

辛一、徵

復次，云何如是法身最初證得？

辛二、釋（分三：壬一、顯所由。壬二、顯所依。壬三、顯親證）

壬一、顯所由

謂緣總相大乘法境無分別智，及後得智，五相善修。

壬二、顯所依

於一切地善集資糧金剛喻定，破滅微細難破障故。

壬三、顯現證

此定無間離一切障，故得轉依。

庚三、自在（分二：辛一、徵。辛二、釋）

辛一、徵

復次，法身由幾自在而得自在？

辛二、釋（分二：壬一、標數。壬二、列釋）

壬一、標數

略由五種：

壬二、列釋（分五：癸一、示現自在。癸二、受用自在。癸三、辯說自在。  
癸四、思自在。 癸五、智自在）

癸一、示現自在

一、由佛土、自身相好、無邊音聲、無見頂相自在，由轉色蘊依故。

癸二、受用自在

二、由無罪無量廣大樂住自在，由轉受蘊依故。

癸三、辯說自在

三、由辯說一切名身、句身、文身自在，由轉想蘊依故。

癸四、思自在

四、由現化、變易、引攝大眾、引攝白法自在，由轉行蘊依故。

癸五、智自在

五、由圓鏡、平等、觀察、成所作智自在，由轉識蘊依故。

庚四、依止（分二：辛一、徵。辛二、釋）

辛一、徵

復次，法身由幾種處應知依止？

辛二、釋（分二：壬一、標數。壬二、列釋）

壬一、標數

略由三處：

壬二、列釋（分三：癸一、由佛住。癸二、由受用身。癸三、由變化身）

癸一、由佛住（分二：子一、長行列。子二、頌釋）

子一、長行列

一、由種種佛住依止。

子二、頌釋（分二：丑一、標自五喜。丑二、釋五喜相）

丑一、標自五喜

此中有二頌：

諸佛證得五性喜，皆由等證自界故，離喜都由不證此，故求喜者應等證。

丑二、釋五喜相

由能無量及事成，法味義德俱圓滿，得喜最勝無過失，諸佛見常無盡故。

癸二、由受用身（分二：子一、列。子二、釋）

子一、列

二、由種種受用身依止。

子二、釋

但為成熟諸菩薩故。

癸三、由變化身（分二：子一、列。子二、釋）

子一、列

三、由種種變化身依止。

子二、釋

多為成熟聲聞等故。

庚五、攝持（分三：辛一、徵。辛二、釋）

辛一、徵

應知法身，由幾佛法之所攝持？

辛二、釋（分二：壬一、標數。壬二、列釋）

壬一、標數

略由六種：

壬二、列釋（分六：癸一、由清淨。癸二、由異熟。癸三、由安住。

癸四、由自在。癸五、由言說。癸六、由拔濟）

癸一、由清淨

一、由清淨，謂轉阿賴耶識，得法身故；

癸二、由異熟

二、由異熟，謂轉色根，得異熟智故；

癸三、由安住

三、由安住，謂轉欲行等住，得無量智住故；

癸四、由自在

四、由自在，謂轉種種攝受業自在，得一切世界無礙神通智自在故；

癸五、由言說

五、由言說，謂轉一切見聞覺知言說戲論，得令一切有情心喜辯說智自在故；

癸六、由拔濟

六、由拔濟，謂轉拔濟一切災橫過失，得拔濟一切有情一切災橫過失智故。

辛三、結

應知法身，由此所說六種佛法之所攝持。

庚六、差別（分二：辛一、釋佛法身。辛二、例餘二身）

辛一、釋佛法身（分二：壬一、雙關徵起。壬二、望義別答）

壬一、雙關徵起

諸佛法身，當言有異？當言無異？

壬二、望義別答

依止意樂業無別故，當言無異；無量依身現等覺故，當言有異。

辛二、例餘二身（分二：壬一、受用身。壬二、變化身）

壬一、受用身（分二：癸一、例同。癸二、別簡）

癸一、例同

如說佛法身，受用身亦爾。意樂及業無差別故，當言無異。

癸二、別簡

不由依止無差別故，無量依止差別轉故。

壬二、變化身

應知變化身，如受用身說。

庚七、功德（分二：辛一、徵。辛二、釋）

辛一、徵

應知法身幾德相應？

辛二、釋（分二：壬一、廣建立。壬二、六義攝）

壬一、廣建立（分二：癸一、長行標舉。癸二、以頌讚禮）

癸一、長行標舉

謂最清淨四無量、解脫、勝處、徧處、無諍、願智、四無礙解、六神通、三十二大士相、八十隨好、四一切相清淨、十力、四無畏、三不護、三念住、拔除習氣、無忘失法、大悲、十八不共佛法、一切相妙智等功德相應。

癸二、以頌讚禮（分十六：子一、四無量。子二、解脫勝處徧處。子三、無諍。子四、願智。子五、四無礙解。子六、六神通。子七、諸相隨好。子八、四清淨。子九、十力。子十、四無畏。子十一、不護念住。子十二、拔除習氣。子十三、無忘失法。子十四、大悲。子十五、十八不共佛法。子十六、一切相妙智）

子一、四無量

此中有多頌：

憐愍諸有情，起和合遠離，常不捨利樂，四意樂歸禮。

子二、解脫勝處徧處

解脫一切障，牟尼勝世間，智周徧所知，必解脫歸禮。

子三、無諍

能滅諸有情，一切惑無餘，害煩惱有染，常哀愍歸禮。

子四、願智

無功用無著，無礙常寂定，於一切問難，能解釋歸禮。

子五、四無礙解

於所依能依，所說言及智，能說無礙慧，常善說歸禮。

子六、六神通

為彼諸有情，故現知言行，往來及出離，善教者歸禮。

子七、諸相隨好

諸眾生見尊，皆審知善士，暫見便深信，開導者歸禮。

子八、四清淨

攝受住持捨，現化及變易，等持智自在，隨證得歸禮。

子九、十力

方便歸依淨，及大乘出離，於此誑眾生，摧魔者歸禮。

子十、四無畏

能說智及斷，出離能障礙，自他利非餘，外道伏歸禮。

子十一、不護念住

處眾能伏說，迷離二雜染，無護無忘失，攝御眾歸禮。

子十二、拔除習氣

徧一切行住，無非圓智事，一切時徧知，實義者歸禮。

子十三、無忘失法

諸有情利樂，所作不過時，所作常無虛，無忘失歸禮。

子十四、大悲

晝夜常六返，觀一切世間，與大悲相應，利樂意歸禮。

子十五、十八不共佛法

由行及由證，由智及由業，於一切二乘，最勝者歸禮。

子十六、一切相妙智

由三身至得，具相大菩提，一切處他疑，皆能斷歸禮。

壬三、六義攝（分二：癸一、長行。癸二、頌）

癸一、長行（分二：子一、乘前標義。子二、結歎無上）

子一、乘前標義

諸佛法身，與如是等功德相應。復與所餘自性、因、果、業相應，轉功德相應。

子二、結歎無上

是故應知，諸佛法身無上功德。

癸二、頌

此中有二頌：

尊成實勝義，一切地皆出，至諸眾生上，解脫諸有情。

無盡無等德，相應現世間，及眾會可見，非見人天等。

庚八、甚深（分二：辛一、徵。辛二、釋）

辛一、徵

復次，諸佛法身甚深，最甚深。此甚深相云何可見？

辛二、釋（分二：壬一、以頌別顯。壬二、長行結列）

壬一、以頌別顯（分十二：癸一、生住業住甚深。癸二、安立數業甚深。癸三、現等覺甚深。癸四、離欲甚深。癸五、斷蘊甚深。癸六、成熟甚深。癸七、顯現甚深。癸八、示現等覺涅槃甚深。癸九、住甚深。癸十、顯示自體甚深。癸十一、斷煩惱甚深。癸十二、不可思議甚深。）

癸一、生住業住甚深

此中有多頌：

佛無生爲生，亦無住爲住，諸事無功用，第四食爲食。

癸二、安立數業甚深

無異亦無量，無數量一業，不堅業堅業，諸佛具三身。

癸三、現等覺甚深

現等覺非有，一切覺非無，一一念無量，有非有所顯。

癸四、離欲甚深

非染非離染，由欲得出離，了知欲無欲，悟入欲法性。

癸五、斷蘊甚深

諸佛過諸蘊，安住諸蘊中，與彼非一異，不捨而善寂。

癸六、成熟甚深

諸佛事相雜，猶如大海水，我已現當作，他利無是思。

癸七、顯現甚深

眾生罪不現，如月於破器，徧滿諸世間，由法光如日。

癸八、示現等覺涅槃甚深

或現等正覺，或涅槃如火，此未曾非有，諸佛身常故。

癸九、住甚深

佛於非聖法，人趣及惡趣，非梵行法中，最勝自體住。

癸十、顯示自體甚深

佛一切處行，亦不行一處，於一切身現，非六根所行。

癸十一、斷煩惱甚深

煩惱伏不滅，如毒咒所害，由惑至惑盡，證佛一切智。

癸十二、不可思議甚深

煩惱成覺分，生死爲涅槃，具大方便故，諸佛不思議。

壬二、長行結列

應知如是所說甚深，有十二種。謂生住業住甚深、安立數業甚深、現等覺甚深、離欲甚深、斷蘊甚深、成熟甚深、顯現甚深、示現等覺涅槃甚深、住甚深、顯示自體甚深、斷煩惱甚深、不可思議甚深。

庚九、念（分二：辛一、正念法身。辛二、釋其平等）

辛一、正念法身（分二：壬一、徵。壬二、釋）

壬一、徵

**若諸菩薩念佛法身。由幾種念應修此念？**

壬二、釋（分二：癸一、長行。癸二、頌）

癸一、長行（分二：子一、標數。子二、列釋）

子一、標數

**略說菩薩念佛法身。由七種念應修此念。**

子二、列釋（分七：丑一、法自在轉。丑二、由其身常住。丑三、由最勝無罪。

丑四、由無有功用。丑五、由受大富樂。丑六、由離諸染污。

丑七、由能成大事）

丑一、法自在轉（分二：寅一、長行總明。寅二、頌更別簡）

寅一、長行總明

**一者，諸佛於一切法得自在轉，應修此念。於一切世界得無礙通故。**

寅二、頌更別簡

此中有頌：

有情界周徧，具障而闕因，二種決定轉，諸佛無自在。

丑一、由其身常住

二者，如來其身常住，應修此念。真如無間解脫垢故。

丑二、由最勝無罪

三者，如來最勝無罪，應修此念。一切煩惱及所知障，並離繫故。

丑三、由無有功用

四者，如來無有功用，應修此念。不作功用，一切佛事無休息故。

丑四、由受大富樂

五者，如來受大富樂，應修此念。清淨佛土大富樂故。

丑五、由離諸染污

六者，如來離諸染污，應修此念。生在世間，一切世法不能染故。

丑七、由能成大事

七者，如來能成大事，應修此念。示現等覺般涅槃等，一切有情未成熟者能令成熟，已成熟者令解脫故。

癸二、頌（分二：子一、顯七圓滿。子二、勸應修念）

子一、顯七圓滿

此中有二頌：

圓滿屬自心，具常住清淨，無功用能施，有情大法樂。徧行無依止，平等利多生，

子二、勸應修念

一切佛智者，應修一切念。

辛一、兼顯淨土（分二：壬一、廣淨土相。壬二、釋其受用）

壬一、廣淨土相（分二：癸一、徵。癸二、釋）

癸一、徵

復次，諸佛清淨佛土相云何應知？

癸二、釋（分二：子一、引經序說功德。子二、釋成十八圓滿）

子一、引經序說功德

如《菩薩藏百千契經·序品》中說：謂薄伽梵住最勝光曜，七寶莊嚴，放大光明，普照一切無邊世界，無量方所，妙飾間列，周圓無際，其量難測，超過三界所行之處，勝出世間善根所起，最極自在淨識為相。如來所都，諸大菩薩眾所雲集，無量天、龍、藥叉、健達縛、阿素洛、揭路荼、緊捺洛、莫呼洛伽、人、非人等常所翼從。廣大法味，喜樂所持，作諸眾生一切義利，蠲除一切煩惱災橫，遠離眾魔，過諸莊嚴。如來莊嚴之所依處，大念慧行以為遊路，大止妙觀以為所乘，大空、無相、無願解脫為所入門，無量功德眾所莊嚴，大寶花王之所建立大宮殿中。

子二、釋成十八圓滿

如是現示清淨佛土，顯色圓滿、形色圓滿、分量圓滿、方所圓滿、因圓滿、果圓滿、主圓滿、輔翼圓滿、眷屬圓滿、住持圓滿、事業圓滿、攝益圓滿、無畏圓滿、住處圓滿、路圓滿、乘圓滿、門圓滿、依持圓滿。

壬二、釋其受用

復次，受用如是清淨佛土，一向淨妙，一向安樂，一向無罪，一向自在。

庚十、業（分二：辛一、標釋五業。辛二、釋其平等）

辛一、標釋五業（分二：壬一、標數。壬二、列釋）

壬一、標數

復次，應知如是諸佛法界，於一切時能作五業。

壬二、列釋（分五：癸一、救濟災橫。癸二、救濟惡趣。癸三、救濟非方便。

癸四、救濟薩迦耶。癸五、救濟乘）

癸一、救濟災橫

一者，救濟一切有情災橫為業。於暫見時，便能救濟盲聾狂等諸災橫故。

癸二、救濟惡趣

二者，救濟惡趣爲業。按諸有情出不善處，置善處故。

癸三、救濟非方便

三者，救濟非方便爲業。令諸外道捨非方便，求解脫行，置於如來聖教中故。

癸四、救濟薩迦耶

四者，救濟薩迦耶爲業。授與能超三界道故。

癸五、救濟乘

五者，救濟乘爲業。拯拔欲趣餘乘菩薩，及不定種性諸聲聞等，安處令修大乘法行故。

辛二、釋其平等（分二：壬一、長行略標。壬二、頌釋因緣）

壬一、長行略標

於此五業，應知諸佛業用平等。

壬二、頌釋因緣

此中有頌：

因依事性行，別故許業異，世間此力別，無故非導師。

戊二、釋諸妨難（分八：己一、釋說一乘。己二、釋同時有多佛。己三、釋佛畢竟涅槃及不涅槃。己四、釋受用身非自性身。己五、釋變化身非自性身。己六、釋二身常。己七、釋佛化身非畢竟住。己八、釋求佛果應作功用）

己一、釋說一乘（分二：庚一、長行問起。庚二、以頌答釋）

庚一、長行問起

若此功德圓滿相應諸佛法身，不與聲聞獨覺乘共，以何意趣佛說一乘？

庚二、以頌答釋（分二：辛一、略辨所為。辛二、廣別意趣）

辛一、略辨所為

此中有二頌：

為引攝一類，及任持所餘，由不定種性，諸佛說一乘。

辛二、廣別意趣

法無我解脫，等故性不同，得二意樂化，究竟說一乘。

己二、釋同時有多佛（分二：庚一、長行問起。庚二、以頌答釋）

庚一、長行問起

如是諸佛同一法身，而佛有多，何緣可見？

庚二、以頌答釋

此中有頌：

一界中無二，同時無量圓，次第轉非理，故成有多佛。

己三、釋佛畢竟涅槃及不涅槃（分二：庚一、長行問起。庚二、以頌答釋）

庚一、長行問起

云何應知於法身中，佛非畢竟入於涅槃，亦非畢竟不入涅槃？

庚二、以頌答釋

此中有頌：

一切障脫故，所作無竟故，佛畢竟涅槃，畢竟不涅槃。

己四、釋受用身非自性身（分三：庚一、徵。庚二、釋。庚三、結）

庚一、徵

何故受用身，非即自性身？

庚二、釋（分二：辛一、標由六因。辛二、一一別列）

辛一、標由六因

由六因故。

辛二、一一別列

一、色身可見故，二、無量佛眾會差別可見故，三、隨勝解見，自性不定可見故，四、別別而見，自性變動可見故，五、菩薩聲聞及諸天等種種眾會，間雜可見故，六、阿賴耶識與諸轉識，轉依非理可見故。

庚三、結

佛受用身，即自性身，不應道理。

己五、釋變化身非自性身（分二：庚一、徵。庚二、釋）

庚一、徵

何因變化身，非即自性身？

庚二、釋（分二：辛一、標由八因。辛二、隨應別釋）

辛一、標由八因

由八因故。

辛二、隨應別釋（分六科：壬一、釋初二因。壬二、釋三、四因。壬三、釋第五因。

壬四、釋第六因。壬五、釋第七因。壬六、釋第八因）

壬一、釋初二因

謂諸菩薩，從久遠來，得不退定，於暗史多及人中生，不應道理。

壬二、釋三、四因

又諸菩薩，從久遠來，常憶宿住，書算數印工巧論中，及於受用欲塵行中，不能正知，不應道理。

壬三、釋第五因

又諸菩薩，從久遠來，已知惡說，善說法教，往外道所，不應道理。

壬四、釋第六因

又諸菩薩，從久遠來，已能善知三乘正道，修邪苦行，不應道理。

壬五、釋第七因（分二：癸一、長行正釋。癸二、頌更顯成）

癸一、長行正釋（分三：子一、標過。子二、縱難。子三、斥顯）

子一、標過

又諸菩薩，捨百拘胝諸瞻部洲，但於一處成等正覺，轉正法輪，不應道理。

子二、縱難（分二：丑一、縱。丑二、難）

丑一、縱

若離示現成等正覺，唯以化身，於所餘處，施作佛事。

丑二、難

即應但於睹史多天成等正覺，何不施設徧於一切瞻部洲中同時佛出？

子三、斥顯（分二：丑一、斥他。丑二、顯自）

丑一、斥他

既不施設，無教無理。

丑二、顯自（分二：寅一、釋通契經。寅二、舉其因喻）

寅一、釋通契經

雖有多化，而不違彼無二如來出現世言。

寅二、舉其因喻

由一四洲攝世界故。如二輪王，不同出世。

癸二、頌更顯成

此中有頌：

佛微細化身，多處胎平等，為顯一切種，成等覺而轉。

壬六、釋第八因

為欲利樂一切有情，發願修行證大菩提，畢竟涅槃，不應道理。願行無果，成過失故。

己六、釋二身常（分二：庚一、難。庚二、釋）

庚一、難

佛受用身及變化身既是無常，云何經說如來身常？

庚二、釋（分二：辛二、由所依。辛二、由密意）

辛二、由所依

此二所依法身常故。

辛二、由密意（分三：壬一、顯因。壬二、舉喻。壬三、合法）

壬一、顯因

又等流身及變化身，以恆受用，無休廢故；數數現化，不永絕故。

壬二、舉喻

如常受樂，如常施食。

壬三、合法

如來身常，應知亦爾。

己七、釋佛化身非畢竟住（分三：庚一、長行。庚二、頌）

庚一、長行（分三：辛一、標由六因。辛二、一一別釋。辛三、結非常住）

辛一、標由六因

由六因故，諸佛世尊所現化身，非畢竟住。

辛二、一一別釋

一、所作究竟，成熟有情已解脫故。二、為令捨離不樂涅槃，為求如來常住身故。三、為令捨離輕毀諸佛，令悟甚深正法教故。四、為令於佛深生渴仰，恐數見者生厭怠故。五、令於自身發動精進，知正說者難可得故。六、為諸有情極速成熟，令自精進不捨軀故。

庚二、頌（分二：辛一、攝前六因。辛二、結非常住）

辛一、攝前六因

此中有二頌：

由所作究竟，捨不樂涅槃，離輕毀諸佛，深生於渴仰。

辛二、結非常住

內自發正動，為極速成熟，故許佛化身，而非畢竟住。

己八、釋求佛果應作功用（分二：庚一、長行設難。庚二、以頌顯釋）

庚一、長行設難

諸佛法身無始時來無別無量，不應為得更作功用。

## 庚二、以頌顯釋

此中有頌：

佛得無別無量因，有情若捨動功用，證得恆時不成因，斷如是因不應理。

### 甲三、結指釋竟分

《阿毘達磨大乘經》中〈攝大乘品〉，我阿僧伽略釋究竟。

## 肆、結示勸修

### 甲一、甚深見——安住菩薩種性

一、於極難真實義理，能隨順悟入。

二、於諸有情，非有因緣而生親愛。

### 甲二、廣大行——廣修六度萬行

- 一、唯為饒益諸有情故，常處生死，忍無量苦。
- 二、於多煩惱難伏有情，善能解了，調伏方便。
- 三、具不思議大威神力。

—— 《攝大乘論》講表 竟 ——

—— 《瑜伽師地論》 ——